



ՍՈՒՐԲ ԱՄԵՆԱՎԻՐԿԻՅ

Սիզակետի «Սուրբ Ամենավիրկիյ» հայ կաթողիկէ եկեղեցու հոգեւոր պարբերաթերթը

Այս թերթի ստեղծման նպատակը

Սիրելի՛ սիզակետցիներ, այս թերթն իր բնույթով հոգեւոր-մշակութային է: Թերթի ստեղծման դրդապատճառը համայնքի բնակչուկայան մեծամասնության անտարբերությունը կամ անբավարար հետաքրքրվածությունն է հոգեւոր կյանքով, եկեղեցական միասնական աղոթքներով եւ քրիստոնեութեամբ ընդհանրապես:

Հետեւաբար, թերթի նպատակն է՝ ծառայել ձեր հոգեւոր ներաշխարհի հարստացմանը եւ առավել զարգացմանը:

Ձեզանից շատերի հետ գրուցելով եկել եմ այն եզրակացութեան, որ այսօր շատերի մոտ հավատքը գոյատեւում է գոլտ անհատական, առանձնացված մակարդակում, այսինքն՝ շատերը սովոր են աղոթել հիմնականում տանը՝ «սրբերի անկյուններին» առջեւ կամ ժամանակ առ ժամանակ գնում են մոմ վառելու եւ կարճատեւ աղոթքի՝ Սուրբ Ամենավիրկիյ եկեղեցի, կամ մատաղ են անում, երբեմն էլ գնում են «ուխտի»՝ ինչ-որ մի սրբավայր: Աղոթելն, անշու՛շտ, անհրաժեշտ է եւ վկայում է ձեր հավատքի եւ աստվածասիրութեան մասին, բայց թվարկած սովորութիւնները ձեր հավատքը դարձրել են անհատական, մեկուսացված, աղոթք՝ միայն ձեր եւ ձեր ընտանիքների համար եւ միայն ձեր ընտանիքի հետ միասին, միայն մոմ վառելով կամ միայն մատաղ անելով: Երբեմն եկեղեցի հաճախելը՝ ոչ Սուրբ Պատարագի եւ այլ ընդհանուր աղոթքների ժամերին կամ առանձին աղոթելը, դեռ չի նշանակում աղոթել Աստծուն հաճելի ձեւով, առատ սեր ցուցաբերել Աստծո նկատմամբ եւ Տիրոջ առաջ հոգեւոր պարտականութիւնները համարել կատարված: Այդպես դուք ապրում եք մի հոգեւոր կյանք, որը միայն ձե՛ր սեփական պատկերացման համաձայն է եւ ոչ թե՛ Տեր Հիսուս Քրիստոսի եւ Եկեղեցու: Իսկ մարդը՝ առանց Քրիստոսի եւ Նրա Սուրբ Եկեղեցու առաջնորդութեան, հեշտութեամբ կարող է սխալվել եւ սխալվում է:

Հավատքը սրտումդ ունենալը եւ այն պապերից ժառանգած լինելը դեռ չի նշանակում, որ ամեն ինչ ճիշտ գիտես հավատքի, աղոթքի եւ Աստծո մասին: Պապերից ստացած հոգեւոր, բարոյական ժառանգութիւնը, արժեքները, դաստիարակութիւնը շատ կարեւոր են եւ հիմնարար, բայց պետք է միշտ հիշել, որ մեր պապերը սովորել են ոչ միայն իրենց պապերից, այլեւ եւ նախեւառաջ՝ Տիրոջ Սուրբ Եկեղեցուց եւ իրենց քահանաներից, վարդապետներից: Եվ, բացի այդ, ձեր պապերը, դեռեւս մինչեւ 1930-ականների կոմունիստական արգելքը, անխախտ ձեւով կապված են եղել եկեղեցական աղոթքների հետ, քահանաների հետ, Ավետարանի եւ քրիստոնեական ուսմունքի սերտորոշութեան հետ, կիրակնօրյա Պատարագի ժամը իրենց համար սուրբ է եղել, Աստծո պատվիրանները, քահանայի խոսքը՝ հարգված եւ ընդունելի, նաեւ կիրառելի՝ ընտանեկան կյանքի մեջ եւ աշխատանքում:

1938-1991թթ. դուք եւ ձեր հայրերը հնարավորութիւն չէք ունեցել մասնակցելու Սուրբ Պատարագի եւ միասին, քահանայի առաջնորդութեամբ աղոթելու ձեր եկեղեցում, եւ դա կոտրել է ձեր պապենական հին սովորութիւնը՝ եկեղեցում միասին աղոթելու, Քրիստոսի հետ միանալու Նրա Սուրբ Պատարագի ժամանակ, դուք եւ ձեր հայրերը հնարավորութիւն չէք ունեցել ճաշակելու Տիրոջ Սուրբ Մարմինն ու Արցունը, ձեր ասած «նշխարը», որը, սակայն, քրիստոնեական կյանքի հիմնաքարն է:

Որպես հետեւանք, 1991-ից հետո, երբ եկեղեցին սկսեց գործել եւ հայ կաթողիկէ քահանաները վերսկսեցին ծառայել գյուղում, ձեր պապենական հին սովորութիւնը արդեն մոռացված էր՝ ընդամենը մոտ վաթսուն տարիների ընթացքում: Քահանաների նահատակութիւնը, աքսորը, եկեղեցու փակվելը, անաստվածութեան պետական քարոզը, փաստորեն, ձեր հիշողութեան միջից կարողացան ջնջել ձեր պապերի թանկարժեք սովորութիւնը, որ հոգեւոր եւ բարոյական արժեքների մի ամբողջութիւն էր՝ դեռեւս ժառանգված Արեւմտյան Հայաստանից: Ձեր հավատքը մնաց միայն տներում եւ ձեր անհատական պատկերացումների շրջանակներում,



դուք կամ ձեզանից շատերը, ըստ էութեան, մինչ օրս անվերադարձ, կտրվեցիք Տիրոջ հետ միությունից՝ Սուրբ Հաղորդությունից՝ «նշխար»-ը ճաշակելուց, որը հաստատել է Ինքը՝ Տերը եւ ոչ թե քահանաները:

Սա՛ է չարի հաղթանակը, որ գործում է միշտ ծպտված եւ աննկատելի:

Բայց կա նաեւ հուսադրող եւ ուրախացնող մի փաստ. Սուրբ Հոգու լուռ ներգործութեան, շատերի հոգեւոր առավել բարձր գիտակցութեան եւ հոգեւորականների աշխատանքի շնորհիվ այսօր կա հավատացյալների մի ոչ մեծ խումբ՝ տարբեր տարիքի, ովքեր կանոնավոր կերպով գրեթե միշտ ներկա են միասնական աղոթքներին:

Փա՛ռք Աստծուն, որ փոխում է մարդկանց սրտերը աննկատ կերպով:

Բայց այդ խումբը շատ փոքր է՝ համեմատած գյուղի բնակչութեան թվի հետ: Եվ սա բնա՛վ պատիվ չի բերում Սիզավետի նման ավանդապահ մի գյուղի:

Ձեր գյուղի հոգեւոր պատմութեան, Սուրբ Պատարագի եւ Սուրբ Հաղորդութեան մասին կարող եք այս թերթում ծանոթանալ առանձին հոդվածներով, բայց, խնդրում եմ՝ ձեր սոցիալական խնդիրներով եւ գյուղատնտեսական անվերջանալի աշխատանքներով գերզբաղված առօրյայում անպայմանորեն ժամանակ հատկացրե՛ք՝ ընթերցելու այս թերթը եւ մտածելու դրանց մեջ գրված պատմությունների, վերլուծված իրողությունների, մարտահրավերների, հոգեւոր ուսուցումների մասին, որոնք, հուսամ, ձեզ կօգնեն ավելի զգոն եւ սթափ ձեռով մոտենալու ձեր եւ ձեր զավակների հոգեւոր նկարագրին եւ անձանք:



Այսօր մենք բոլորս կարիքն ունենք՝ վերանայելու Աստծո հետ մեր հարաբերությունները, ուղղելու մեր սխալները, լրացնելու մեր բացերը, որովհետեւ, ի վերջո, մարդս ինչքան էլ ձգտի ապրել ինքնուրույն, չի՛ կարող հաջողվել՝ առանց Աստծո օրհնությունների եւ առաջնորդութեան: Աստծուց հեռու՝ միայն իր առօրյա նյութական խնդիրներով ապրող մարդը, առանց գիտակցելու, հեշտութեամբ կարող է ընկնել չարի գերութեան մեջ եւ զրկվել Աստծո օրհնություններից, իր հոգու փրկությունից՝

առհավետ...

Քանի դեռ ուշ չէ, նայեցե՛ք ինքներդ ձեզ եւ ձեր հայացքն ուղղե՛ք դեպի Տերը, որ մեր միակ ճանապարհն է դեպի երջանկություն՝ այս կյանքում եւ Աստծո Արքայութեան մեջ:

«Ես եմ ճանապարհը, ճշմարտությունը եւ կյանքը», Հվճ. 14, 6:

Տ. Հովսեփ Քհն. Գալստյան՝

Մեծ Սեպտեմբեր, Ղազանչի, Բավրա եւ Սիզավետ գյուղերի հոգեւոր հովիվ, Հուլիս, 2020





Սիգավետի հոգեւոր պատմությունը

«Պատի՛ր բարի ավանդը՝ Սուրբ Հոգու օգնությամբ, որ բնակվում է մեր մեջ» (Բ Տիմ. 1, 14):



Սիգավետի վերաբերյալ ամբողջական պատմական տեղեկություններ այսօր գտնելը բավական դժվար է, բանավոր պատմությունների առավել հավաստի կենդանի կրողները եւս արդեն քիչ են: Որպեսզի ինչ որ պատկերացում կազմենք գյուղի հոգեւոր պատմության մասին, ինչը որ այս թերթի համար առավել կարեւոր է, հարկավոր է մեծ համբերությամբ հավաքել բոլոր տեղեկությունները, լսել շատերի պատմությունները, ընթերցել ժամանակի պատմական անցքերի վերաբերյալ նկարագրություններ, առանձին անհատների հուշեր: Հետեւաբար, ինչ որ փաստերի կամ թվերի մեջ, գուցե, որոշակի անճշտություններ լինեն, որի համար հայցում եմ ձեր ներողամտությունը:

Այստեղ ջանացել եմ ավելի կենտրոնանալ հոգեւոր նկարագրի վրա, որպեսզի հասկանանք, թե ինչպիսի հոգեւոր ժառանգություն, ինչպիսի դեռ չբացահայտված հոգեւոր

ներուժ ունի գյուղը, եւ թե արդյոք կարող է գյուղը լինել ավելին՝ հոգեւորի մեջ, քան ինչ որ է՝ մեր օրերում:

Գաղթը

Ինչպես տարածաշրջանի հայ կաթողիկէ շատ այլ գյուղերը, Սիգավետ կամ հին անունով Քոռաղբյուր գյուղը եւս հիմնվել է Արեւմտյան Հայաստանից դեպի Շիրակ գաղթած հայ կաթողիկէ ընտանիքների կողմից, որոնք գաղթել են նախ 1829–30թթ. Մեծ Գաղթի օրերին, ռուս–թուրքական պատերազմի ավարտից հետո, երբ Արեւմտյան Հայաստանի տարածքները մնացին Թուրքիայի տիրապետության տակ, իսկ Արեւելյան Հայաստանը՝ Ռուսաստանի: Մոտ 70.000 հայ այդ գաղթի ժամանակ, թողեց իրենց պապենական հողերը, տները եւ ռուսական զորքերի հետ միասին անցավ Զավախք եւ Արեւելյան Հայաստան, տեղավորվեց հիմնականում Շիրակում, Լոռիում եւ Գավառում: Հայ կաթողիկէ ընտանիքները հաստատվեցին Զավախքում, Լոռիում եւ Շիրակի գյուղերում: Սիգավետ գյուղը հիմնող գաղթական ընտանիքները այդ գյուղի տարածքում հաստատվել են տարբեր թվականներին եւ Արեւմտյան Հայաստանի տարբեր բնակավայրերից: Օրինակներ. Պողոսյանների տոհմի պապերը եկել են Արդահանի գավառի Վել գյուղից, որտեղից նախ անցել են Զավախք, հաստատվել Ախալքալախի Տուրցիս եւ հարեւան այլ գյուղերում, ապա՝ անցել Լոռի եւ Շիրակ, հաստատվել մի մասը՝ Շահնազար գյուղում, ապա մյուս մասն եկել է Քոռաղբյուրի տարածք: Լոռվա Շահնազարում են հաստատվել եւ ապա Քոռաղբյուրում՝ նաեւ Հլոյանները, Մչեցյանները (վերջիններիս մի թեւը հետագայում եւս դարձավ Պողոսյան): Բեռնեցյանները գաղթել են Կարսի Բեռնի կաթողիկէ գյուղից: Տերանց տոհմը գաղթել է Խնուս գավառի Քյուլլի գյուղից, հաստատվել Զավախքի Հեշտիա գյուղում, ապա՝ Քոռաղբյուրում:

Տոհմերը շատ են եւ այստեղ չեմ հիշատակում բոլոր տոհմերի անունները, որովհետեւ այս հոդվածի համար դա չէ կարեւորը, այլ՝ այն, որ բոլոր ընտանիքների ճնշող մեծամասնությունը գաղթել է կաթողիկէ համայնքներից. հայ կաթողիկէ դավանանքը եղել է նրանց միավորող կարեւոր գործոն: Կաթողիկէ դավանանքը նաեւ նրանց օգնել է պահպանել ոչ միայն հավատքը եւ միությունը Տիրոջ Ընդհանրական Սուրբ Եկեղեցու հետ, այլեւ՝ իրենց տոհմային ավանդությունները եւ հայ ազգային դիմագիծը: Կաթողիկէ դավանանքը անխախտ պահելը քոռաղբյուրցիների համար ոչ միայն հավատքի հարց էր, այլեւ՝ Արեւմտյան Հայաստանում թողած հայրենական ժառանգությունը պահելու, հին ու քաղցր հիշողություններով ապրելու հարց, որը նոր սերունդների մեջ աստիճանաբար թուլացավ, մասնավոր, կոմունիստական հալածանքների տարիներին: Բայց մինչ օրս էլ կարելի է տարեցներից լսել իրենց ծնողների, պապերի պատմությունները՝ արդեն ոչ շատ մանրամասն եւ աղոտ հիշողությամբ:

Սուրբ Ամենափրկիչ եկեղեցին

Գյուղի Սուրբ Ամենափրկիչ եկեղեցին կառուցվել է 1857-ին, մի թվական, որը վկայում է այն մասին, եկեղեցի ունենալու պահանջը մեծ է եղել, եւ եկեղեցին բավական շուտ են կառուցել: Այդ տարիներին ներգաղթը դեռեւս ընթացքի մեջ էր: Ղեւոնդ Ալիշանի «Շիրակ» աշխատության աշխարհամարի տեղեկութիւններով, Քոռաղբյուրում 1873թ. ապրում էր 30 հայ կաթողիկէ ընտանիք՝ 234 անձով¹: Պետք է մտածել, որ եկեղեցու կառուցման ժամանակ բնակիչների թիվն ավելի քիչ է եղել, բայց գյուղում կառուցել են բավական մեծ եկեղեցի՝ միանալով, հարթ ծածկով ու վերնահարկով: Սա վկայում է մեծ հավատքի եւ բարեգործութեան մեծ պատրաստակամութեան մասին: Այսօր այլեւս գրեթէ անհնարին է իմանալ, թե ինչպէս են կազմակերպել եկեղեցու կառուցումը, ով է նախաձեռնել, ով է եղել գյուղի քահանան, ինչ միջոցներով են կառուցել (եթէ, իհարկե, մի օր պատմաբաններից մեկը հանձն չառնի ժամանակի պատմական եկեղեցական վավերագրերի հայտնաբերման եւ ուսումնասիրութեան շնորհընկալ աշխատանքը): Կարելի է գրեթէ վստահութեամբ ասել, որ բնակիչներն իրենց ձեռքով են կառուցել եկեղեցին՝ հավատքի մի վկայութիւն, որը բնորոշ էր կաթողիկէ բոլոր գյուղերին:

Սուրբ Ամենափրկիչ եկեղեցին կանոնավոր կերպով գործել է մինչեւ 1930-ականների վերջը, երբ կոմունիստներն արգելեցին հայ կաթողիկէ քահանաների ծառայութիւնը խորհրդային միութեան ողջ տարածքում, իսկ եկեղեցին վերածեցին գյուղմթերքի պահեստի:

1990-ականներին, երբ հայ կաթողիկէ քահանաները վերակեցին իրենց ծառայութիւնը գյուղում, Հ. Միքայել Վրդ. Սուրաղյանը սկսեց Սուրբ Պատարագ մատուցել նախ գյուղի դպրոցում:

1993թ. Միզավետ այցելեց եւ գյուղացիներին իրենց հավատքի մեջ ամրանալու, հոգեւոր կյանքն աշխուժացնելու հայրական խոսքով դիմեց նաեւ Տանն Կիլիկիո Կաթողիկէ Հայոց Կաթողիկոս Պատրիարք Հովհաննէս Պետրոս 18-րդ Գասպարյանը:

1996թթ. Սուրբ Ամենափրկիչը մաքրեցին եւ հունիսի 8-ից կիսավեր եկեղեցում տեղի ունեցավ առաջին մկրտութիւնը:

Եկեղեցու այսօրվա տեսքը բոլորովին այլ է, որովհետեւ այսօրվա շինութիւնը 2002-2005թթ. կատարված վերակառուցման արդյունքն է. հին եկեղեցու պատերը եւ կոմունիստների ժամանակ կառուցված թիթեղյա ծածկը եղել են կիսափուլ վիճակում, մասնազետեւների կարծիքով ամրացնել այլեւս հնարավոր չի եղել, այդ պատճառով քանդել են հին գեղեցիկ սեւ տուֆով կառուցված պատերի վերին մասը եւ ստորին հատվածի վրա կառուցել նոր շինութիւն՝ վարդազույն տուֆով: Քանդված պատերի քարերի մի մասը դրված են եկեղեցու պարիսպների մեջ, շատ քարեր պահպանել են իրենց նախնական տեսքը, քարերից մեկը՝ խաչի պատկերով դրված է եկեղեցու մուտքի վերեւում, զանգակատան պատի մեջ: Կառուցել են նաեւ փոքրիկ զանգակատուն: Վերակառուցված եկեղեցին հանդիսավոր արարողութեամբ օծվեց 2005թ.՝ ձեռամբ Արհ. Տ. Նշան Արքեպս. Գարաբեհեյանի: Գյուղում այդ ժամանակ ծառայում էր Արթ. Տ. Գրիգոր Քհն. Մկրտչյանը՝ ծնունդով հարեւան Մեծ Սեպասար գյուղից: 2001-2008թթ. նա կանոնավոր հիմքերի վրա դրեց Սուրբ Պատարագի եւ այլ եկեղեցական խորհուրդների մատուցումը եկեղեցում: Կանոնավոր աղոթական կյանքը շարունակեցին նրան հաջորդող քահանաները՝ Տ. Նարեկ Քհն. Թադեւոսյանը՝ 2008-2013թթ., Հ. Պետրոս Վրդ. Եսայանը՝ 2013թ., Հ. Գառնիկ Վրդ. Հովսեփյանը՝ 2013-2015թթ., Հ. Ռաֆայել Վրդ. Կրավչիկը, ապա՝ 2016թ. սկսած՝ ես՝ ձեր խոնարհ ծառան:



2018թ. վերջին Հայկական Կարիտասի օգնութեամբ, «Ծխական հասարակական խորհուրդներ» ծրագրով գյուղացիների, հատկապէս, Արարատ Պողոսյանի, Հենրիկ Պողոսյանի

¹ Հ. Ղեւոնդ Ալիշան, «Շիրակ. Բ Արեւելեան Շիրակ», Սուրբ Ղազար, 1881թ. էջ 144



կամավոր աշխատանքով կառուցեցինք եկեղեցու բակի դարբասը, նորոգեցինք պարխայները, ծնունդով Սիգավետից քարտաշ վարպետ Արամի ամբողջովին կամավոր եւ ձրի աշխատանքով եւ գյուղացիների դրամական աջակցութեամբ կառուցեցինք քարե Սուրբ Սեղանը: Սեղանի միջնամասում տեղադրեցինք նաեւ Տիրոջ Խաչափայտի սուրբ մասունք, որը նվիրեց Արհ. Տ. Ռաֆայել Արքեպս. Մինասյանը եւ իր ձեռքով օձեց Սուրբ Սեղանը՝ 2019-ին:

Թուրքերի ջարդերը եւ սրբապղծությունը

Քրուաղբյուրը Ալեքսանդրապոլի գավառի շատ այլ գյուղերի նման ենթարկվել է թե երիտթուրքական կառավարութեան 1918թ. գործերի վեցամսյա օկուպացիային եւ թե, հատկապես, 1920թ. դեկտեմբեր եւ հունվար ամիսների թալանին, սպանութիւններին, սոցիալական դժվարութիւններին, Ֆիզիկական եւ այլատեսակ բռնութիւններին: Իրենց հայրենի երկրից արտաքսվելուց ինը տասնամյակ անց սիգավետցիները դարձյալ վերապրեցին թուրքական գազանութիւնների հետեւանքները՝ նոր նահատակներով հանդերձ: Հայաստանի Ազգային արխիվի տեղեկութիւնները փաստում են հետեւյալը. «Թուրքական բանակում «այլասերումը մեծ չափեր» էր ընդունել: Թուրքերն ամենուր իրենց պահում էին անասելիորեն սանձարձակ: Ժամանակակիցը վկայում է, որ Խոտայ Խարաբա (Բավրա), Դարակեյ (Սարագյուղ), Կոր-Աղբյուր (Սիգավետ), Կոյակուլի-Ղազանջի եւ Շիշթափա (Սեպասար) հայկական գյուղերում կանայք եւ աղջիկները ենթարկվել են բռնարարքների, նրանց մի մասին առեւանգել են տաճիկները, իսկ մի մասին էլ՝ հարեւան Աղաբաբայ գյուղի թուրքերը: Այդ գյուղերում պատկերը շատ ծանր էր. ամեն ինչ կամ ավերված էր, կամ էլ վառված, ամենուր ընկած էին տասնյակ դիակներ, պատահում էին նաեւ կիսամեռ եւ սովահար եղած երեխաներ ու ծերեր²»: Թուրքերն անխնա թալանում էին ամեն ինչ՝ տան կահույքը, նույնիսկ վառարանները, ի սպառ ունեցրկում բնակիչներին, տանում էին հացահատիկի բերքը, անասունները, «բայրա» կոչված հարկ պահանջում գյուղացիներից, ուլբեր հրաժարվում էին կատարել իրենց պահանջները, գաղտնի սպանում էին, հիմնականում գիշերները:

Պատմում են, որ մի թուրք զինվոր ուզեցել է մտնել Սուրբ Ամենափրկիչ եկեղեցին, դուռը փակ է եղել, իսկ գյուղացին, որի մոտ եղել է բանալին, հրաժարվել է բացել դուռն կողպեքը: Թուրքը կրակել է եկեղեցու դուռն կողպեքի վրա, բացել դուռը, մտել եւ պղծել է եկեղեցին, ջարդել Աստվածամոր արձանիկը, ապա նույն վայրկյանին աստվածային պատիժը վրա է հասել, թուրքը սկսել է դիվահարվել, կծոտել սեփական ձեռքերը եւ դուրս փախել եկեղեցուց:

Այսպիսի հալածանքներ տեսած ժողովուրդը չի կորցրել իր հույսը՝ հիշելով, թե ինչպես են իրենց պապերը Արեւմտյան Հայաստանում քրիստոնեական արիութեամբ կրել թուրքական հալածանքների բեռը եւ պահել հավատքի ավանդը՝ ըստ Պողոս առաքյալի խոսքի. «Բարի պատերազմ մղեցի... պահեցի հավատքը», Բ Տիմ. 4, 7:

Քահանաներ՝ մինչեւ կոմունիստները

Մինչեւ 1930-ականների կոմունիստական արգելքն ու աքսորները գյուղում ծառայած հոգեւորականների մասին չեն հիշում բացի միայն մեկից՝ Տ. Միքայել Բոթանջյանից, ով թաղված է գյուղի գերեզմանատանը: Այսօր Պողոս Բոթանջյանի տանը պահպանված է նաեւ Տ. Միքայելի լուսանկարը՝ թոռնուհու՝ Նվարդի հետ: Հ. Միքայելը նախ ծառայել է Ջավախքի Թորիա գյուղում, որտեղ նրա ջանքերով նաեւ կառուցվել է տեղի եկեղեցին: Տ. Միքայելի մասին ստույգ տեղեկութիւնները շատ չեն, ասում են, որ մահացել է գյուղում՝ 1938թ.:

Տիրացու Սերգոն սերում էր մի տոհմից, որին անվանում են «Տերանց», քանի որ դեռեւս իրենց պապերի մեջ եղել են



² Հ. Բ. Աբրահամյան, «Ալեքսանդրապոլյան իրադարձությունների շուրջ, 1920թ. նոյեմբեր-1921թ. ապրիլ»



անվանի քահանաներ՝ Տեր Անտոն անունով: Նրանցից մեկը ծառայել է Խնուս գավառի Քյուլլի գյուղում, իսկ մյուս երկուսը՝ դարձյալ նույն անունով, արդեն գաղթից հետո՝ Ջավախքի Հեշտիա գյուղում: Քյուլլիում ծառայող Տեր Անտոնի մասին պատմում են, որ երբ թուրքերը 1829թ., հարձակվել են Քյուլլիի վրա, Տեր Անտոնը մինչեւ վերջ մնացել է իր հոգեւոր հոտի կողքին՝ որպէս քաջ հովիվ՝ Տիրոջ օրինակով: Տեր Անտոնը եւ գյուղապետը նախապես գյուղի բնակչութեան մեծ մասին տարհանել էին, քանի որ Տեր Անտոնի եւ գյուղապետի տղաները սպանել էին իրենց գյուղում գիշերող թուրք փաշաներից մեկին, ով պահանջել էր իր մոտ բերել գյուղի աղջիկներին եւ, հետեւանքները կանխատեսելով, ջանացել են փրկել ժողովուրդին: Երբ թուրքերը մտել են Քյուլլի, գյուղում մնացել էին միայն ծերերն ու կանայք՝ Տեր Անտոնի հետ միասին: Թուրքերը բոլորին կոտորել են, իսկ Տեր Անտոնին անգիջում եւ հանդուգն կեցվածքի համար կախաղան են բարձրացրել եկեղեցու զանգակատան մեջ: Տերանց տոհմի մյուս քահանաները կազմակերպել են Հեշտիայում հաստատված քյուլլեցիների համայնքային եւ եկեղեցական կյանքը, բայց հետագայում Շիրակ գաղթող ընտանիքների հետ միասին չեն եկել Քոռաղբյուր, որքան որ տեղյակ են բնակիչները: Տեր Անտոնի տոհմից է սերում այսօր Հեշտիայում ծառայող մեր քահանան՝ Տեր Անտոն Անտոնյանը: Քոռաղբյուրում են այսօր բնակվում Տեր Անտոնի տոհմից սերող Մխիթարյանները՝ գյուղի բարեպաշտ հավատացյալ տոհմերից մեկը: Եւ, իհարկե, չմոռանանք Տիրացու Սերգոյին, որի սերունդները թեեւ այսօր գյուղում չեն, բայց նա էր, որ դատեր հետ միասին կոմունիստական տարիներին պահում էր աղոթական կյանքը գյուղում եւ խաչելութեան պատկերն՝ իր տան մեջ՝ չվախենալով հետեւանքներից:

Հավատքի ապրումը խորհրդային տարիներին եւ հետո

Սիգավետցիները շատ սիրել ու պաշտել են եկեղեցում դեռեւս մինչեւ 1930-ականները դրված մի մեծ խաչելութեան պատկեր, որը հրաշագործ գորութեան է ունեցել: գյուղի օրհնութեանը, իրենց ընտանիքների հաջողութեանը կապել են այդ խաչի գորութեան հետ: Այդ խաչելութեանը, ըստ պատմութեանների, եկեղեցուն նվիրել է գյուղի մեծահարուստներից մեկը՝ Հրոյի Մարտիրոսը: 1930-ականներին կոմունիստ անաստվածներն այդ խաչը դուրս են շարժել եկեղեցուց եւ արգելել են այն վերցնել: Գյուղացիների պատմելով մոտ 1 մ. բարձրությամբ այդ խաչը երկար ժամանակ մնացել է հողի տակ՝ լքված: իշխանութեանների վախից ոչ ոք չէր համարձակվում խաչին ձեռք տալ: Բայց 1940-ականներին գյուղացիներից մեկը՝ տիրացու Սերգոն, մի բարեպաշտ հավատացյալ, ընթերցում էր Աստվածաշունչ, աղոթասեր էր, գիշերով իր թոռան հետ միասին հողի տակից հանել է այդ խաչը եւ տարել-դրել է իր տանը, գաղտնի պահել ու մաքրել է: 1950-ականներին՝ Ստալինի մահից հետո, երբ անաստված իշխանութեանները փոքր-ինչ թուլացրեցին հավատքի հալածանքը, գյուղացիները սկսել են հավաքվել Սերգոյի տանը՝ պաշտելու խաչը եւ աղոթելու: Սերգոն խաչը դրել էր մի առանձին սենյակում, որ մատուան էր վերածվել: Մարդիկ գալիս էին Տացու Սերգոյի մոտ, խնդրում նրա աղոթքները, հաղորդվում խաչի գորութեանը: Սերգոն եւ նրա աղջիկը՝ Արեգնազը կամ Արեգ Աչեն, նաեւ մկրտութեաններ են արել՝ Սուրբ Երրորդութեան անունով, ինչպէս աղոթքի բանաձեւը հիշել են իրենց քահանաներից: Խաչի պատկերը հետագայում Սերգոյի թոռներից մեկը գյուղից տարել է Երեւան եւ դարձրել ընտանեկան սրբութեան, առայժմ անվերադարձ...

Խորհրդային տարիներին սիգավետցիները, թեւ քահանա չունեին, բայց տիրացու Սերգոյի եւ այլ աղոթասեր գյուղացիների օգնութեամբ, իրենց պապերից եւ տատիկներից լսած աղոթքներով պահել են իրենց հավատքը, հայ կաթողիկէի նկարագիրը: Այդ աղոթքներից շատերն այսօրվա տարեցների, նաեւ միջին սերնդի ներկայացուցիչների շուրթերին են՝ միախառնված իրենց մանկական հիշողութեաններին եւ գյուղի խոսվածքին: Կարելի է նրանցից լսել հին աղոթքներ, որոնք այժմ շատ քչերն են գործածում եւ կարելի է գտնել միայն հին աղոթագրքերում: Սիգավետցիները հիացմունքով են հիշում իրենց մեծերի աղոթասիրութեանը, թե ինչպէս էին տասնամյակներ շարունակ առավոտ-իրիկուն աղոթում սահմանված թվով «Հայր մեր» եւ «Ողջոյն քեզ, Մարիամ», ընթերցում Նարեկ եւ Ավետարան, աղոթում հիվանդների համար, մատաղ անում, ընտանիքներով գնում ուխտի հին վանքերը:

Ներկայիս հոգեւոր մարտահրավերները՝ ուղղակի խոսքով

Սիրելի՛ սիգավետցիներ, այս համառոտ պատմութեանը ձեր գյուղի հոգեւոր նկարագրի մասին գրի առա այս թերթի մեջ՝ ձեզ, մանավանդ, երիտասարդ սերնդին ծանոթացնելու կամ հիշեցնելու ձե՛ր իսկ հոգեւոր պատմութեանը, հոգեւոր արմատները, հոգեւոր ինքնութեանը, որ հիմված է Տեր Հիսուս Քրիստոսի Սուրբ Կաթողիկէ՝ Ընդհանրական, Եկեղեցու մեջ, որի մի մասն է Հայ Կաթողիկէ Եկեղեցին՝ ձեր Մայր Եկեղեցին, ձեր



Հոգեւոր եւ հայ ազգային նկարագրի անբաժանելի եւ կարեւորագույն մասը: Խնդրանքս է, որ ջանաք առավել հետաքրքրվել ձեր գյուղի, ձեր տոհմերի, հայ ժողովրդի եւ Հայ Կաթողիկէ Եկեղեցու պատմութեամբ՝ հարցնելով ձեր մեծերին, ծնողներին, ընթերցելով գրականութիւն՝ պատմական եւ հոգեւոր, ընթերցելով Աստվածաշունչ եւ, իհարկե, հաճախելով եկեղեցի, գրուցելով հոգեւորականների հետ: Ես սիրով կսպասեմ ձեզանից յուրաքանչյուրին՝ գրուցելու եւ ծառայելու ձեր հոգեւոր ամանը:

Այդ պատմութիւններից դուք կիմանաք, թե ով էք դուք, որտեղից եք գալիս, ինչպիսի հոգեւոր, բարոյական նկարագիր են ունեցել ձեր պապերը, ո՞րն է ձեր Եկեղեցին, ի վերջո, ի՞նչ է Կաթողիկէ Եկեղեցին, ի՞նչ է նշանակում լինել հայ կաթողիկէ եւ, ամենակարեւոր կետը, ուր պիտի հասնեք, թե ինչ է ասում մեր Տեր Հիսուս Քրիստոսը՝ ձեզանից յուրաքանչյուրին այսօր՝ որպէս հայ կաթողիկէների եւ որպէս ձեր երկրի քաղաքացիների:

Մեծ անտարբերութիւն կա ձեր համայնքում, ինչպէս եւ շատ այլ համայնքներում՝ դեպի սեփական հոգեւոր ինքնութիւնը, դեպի Եկեղեցին, դեպի միասնական աղոթքը եւ, ի վերջո, դեպի Աստծո հրավերը՝ ճանաչելու եւ սիրելու իրեն: Այս անտարբերությունը կործանարար է, հավատացե՛ք, կործանարար է՝ ձեր անհատականութիւնների համար, ձեր ընտանիքների համար, եւ, անշուշտ, ձեր համայնքի համար, որ սերում է հոգեւոր եւ ընտանեկան ավանդական արժեքներից, որ շատ դառնութիւններ, նահատակութիւններ է տեսել, կիսել Տիրոջ շարչարանքների ճանապարհը:

Ուզում եմ հատուկ շեշտել հետեւյալը.

Հոգեւորի հանդեպ անտարբերութիւնը նշանակում է ի զուր դարձնել ձեր նախնիների կրած չարչարանքները եւ դրանց հոգեւոր, բարոյական իմաստը, նշանակում է մոռացության մատնել այն ամենը, ինչ նրանք արել են՝ ձեզ ավանդելու համար լավագույն ընտանեկան, տոհմական, հոգեւոր եւ բարոյական արժեքներ:

Սոցիալական ինդիւրները, հանապազօրյա հացի մասին մտահոգութիւնները եղել են միշտ, առավելեւ՝ նախկինում՝ 1929-31թթ. Մեծ Գաղթի տարիներին, նոր պայմաններին համարվելու տասնամյակներին, 1918-21թթ. թուրքական հալածանքների ժամանակ, 1930-ականների կուլակաթափութեան տարիներին, 1990-ականների սկզբներին, նաեւ այսօր: Բայց ձեր պապերը իրենց սոցիալական մեծ բեռների հետ միաժամանակ կարողանում էին միշտ ժամանակ գտնել՝ նաեւ Տիրոջ հանդեպ իրենց ջերմեւանդ սերը ապրելու, Տիրոջ օրը կիրակին, սուրբ պահելու, եկեղեցում միասնաբար աղոթելու համար:

Ձեզանից շատերը մեծ հպարտութեամբ պատմում են իրենց տատիկներից ու պապերից սովորած աղոթքների մասին, ասում են այդ աղոթքները, նույնիսկ այնպիսիք, որոնք այսօր այլեւս մոռացված են, բայց դուք հիշում եք: Դիտում եք, որովհետեւ այդպէս եք դաստիարակվել, որովհետեւ փոքրուց ձեր մեջ սերմանել են սեր՝ աղոթքի նկատմամբ, սեր՝ Եկեղեցու նկատմամբ: Դա՛ է պատճառը, որ ձեր պապերն ապրել են հողաշեն տներում, հավաքվել օգններում, բայց կառուցել են քարե գեղեցիկ եկեղեցի: Այդ հուշերը ձեր մեջ պետք է արթնացնեն հոգեւոր պատվախնդրութիւն՝ համախմբվելու Տիրոջ Սուրբ Սեղանի շուրջ՝ Սուրբ Պատարագին եւ ճաշակելու Տիրոջ Մարմինն ու Արյունը, որ դուք «նշխար» եք ասում: Ձեր եկեղեցին ձեզ պետք է հիշեցնի, որ դուք էլ՝ ձեր հերթին, ձեր պապերի եւ մեծ մայրերի նման, պարտավոր եք ձեր կյանքի օրինակով, ձեր աղոթքներով, ձեր հոգեւոր բարձր նկարագրով օրինակ լինել ձե՛ր զավակների համար եւ նրանց սնուցել հոգեւոր արժեքներով, ձեր զավակներին, որ օրըստօրե ավելի ու ավելի են հեռանում իրենց հոգեւոր արմատներից, որովհետեւ չեն տեսնում ձե՛ր կենդանի օրինակը, իսկ պապերն ու մեծ մայրերն արդեն քիչ են մնացել:

Հետեւաբար, սիրելիներ՛ր, հանուն Տիրոջ եւ ձեր հոգեւոր անցյալի, ավելի սթա՛փի ձեզ սովորեցրե՛ք ձեր նեկայիս հոգեւոր նկարագրին եւ սկսե՛ք նոր՝ առավել աստվածահաճո մի ընթացք:

Ուզում եմ այս գրութիւնն ավարտել Սուրբ Պողոս առաքյալի՝ իր սիրելի հոգեզավակ Տիմոթեոսին ուղղված բառերով.

«Մտաբերում եմ այն անկեղծ հավատը, որ քո մեջ է, որ նախապէս կար քո տատի՝ Լավոդիայի, եւ քո մոր՝ Եվնիկեի մեջ. համոզված եմ, որ կա նաեւ քո մեջ», Բ Տիմ. 1, 5:

Այս գրութիւնը պատրաստելիս ինձ աջակցելու համար շնորհակալութիւն եմ հայտնում սիզավետոցիներ՝ Կարինե Հակոբյանին, Վարդան Պողոսյանին, Պետրոս Բեռնեցյանին, Անիշկա Բեռնեցյանին, Տ. Գրիգոր Ավ. Քհն. Մկրտչյանին:

Տ. Հովսեփ Քհն. Գալստյան՝
Սիզավետի հոգեւոր հովիվ,
հուլիս, 2020թ.



ՔՐԻՍՏՈՆԵԱԿԱՆ ՌԻՍՄՈՒՆՔԻ ԷԶԵՐ՝ ՄԱՏՉԵԼԻ ԼԵԶՎՈՎ

Ինչու՞ է կարելու՝ եկեղեցում ժողովրդի հետ միասին աղոթելու եւ Սուրբ Պատարագին մասնակցելու

Այս թերթի ստեղծման նպատակի մասին վերելում գրելիս՝ անդրադարձա մի շատ կարեւոր փաստի, որ այսօր համատարած է. այն է՝ հավատքը միայն անհատական պատկերացումների մեջ սահմանափակելու երեւոյթը, երբ մարդիկ կարեւորութուն չեն տալիս բոլորի հետ միասին եկեղեցում աղոթելուն եւ կիրակնօրյա Սուրբ Պատարագին մասնակցելուն: Սա, ինչպես գրեցինք, անասովածութեան պետական քարոզչութեան տարիների եւ մեր օրերում հոգեւորի հանդեպ ընդհանուր եւ անտարբերութեան կամ անբավարար հետաքրքրութեան հետեւանք է: Այսօր Աստվածաշունչը, Եկեղեցին, հոգեւոր աճը կարեւոր տեղ չունեն մեզանից շատերի աւօրյայում, որը հագեցած է սոցիալական հարցերով, գյուղատնտեսական ծանր աշխատանքով, ընտանեկան խնդիրներով:

Աստծո առաջ պարտականութիւններ ունենալու գաղափարն այսօր ի սպառ բացակայում է համայնքի մեծամասնութեան պատկերացումներից. մարդկանց թվում է, թե Աստված ամեն ինչ ներում է եւ կների:

Ցավոք, հոգեւորը, սիրո գործերը հիմնականում տեղ չունեն նաեւ երիտասարդների նպատակների եւ երազանքների մեջ:

Հոգեւորը մղված է երկրորդ պլան եւ մեկուսացած, մոռացված է տների սրբապատկերների անկյուններում, պատերի վրա, որտեղ տարիներով փոշոտվում են չօգտագործված աստվածաշնչերն ու վարդարանների համրիչները: Մարդիկ չեն ուզում ժամանակ տրամադրել այդ ամենին, նույնիսկ՝ մեկ ժամ՝ ամբողջ շաբաթվա մեջ:

Բայց սա մեղք է Աստծո հանդեպ. սա նշանակում է՝ Աստծուն արժանի տեղ չհատկացնել մեր կյանքում:

Մեզ, գուցե, թվում է՝ եթե մենք հավատում ենք, որ Աստված գոյութուն ունի, ապա այդքանը բավարար է, եւ իրավունք ունենք խնդրելու կամ պահանջելու, որ Աստված իր առատ օրհնութիւնները բաշխի մեզ, իսկ երբ չենք վայելում այդ օրհնութիւնները, մեր աղոթքները պատասխանի չեն արժանանում, մտածում ենք, որ անօգուտ է Աստծուն աղոթելը, միեւնոյնն է՝ չի լսի, կամ, միեւնոյնն է՝ Աստծո կամքն անհայտ է մեզ: Հետեւանք լինում է այն, որ շատերն աստիճանաբար մոռանում են նաեւ իրենց անհատական աղոթքները կատարել կամ անում են միայն շատ ընկճված, վախեցած ժամանակ, կամ էլ նեղանում են Աստծուց եւ հրաժարվում որեւէ քայլ անել՝ Աստծո կամքը ավելի լավ հասկանալու համար: Բայց Աստված անտարբեր չէ, նա ճանաչում է յուրաքանչյուրիս՝ անուն առ անուն, նա գիտի մեր խնդիրները, լսում է մեր աղոթքները եւ «գիտի, թե ձեզ ինչ է պետք՝ նախքան, որ դուք իրենից կխնդրեք ինչ-որ բան», ինչպես ասում է Հիսուս (Մտթ. 6, 8): Աստված կենդանի Աստված է, մեր կյանքում ներկա է՝ մեզ համար անտեսանելի ձեւով, հետեւում է մեր յուրաքանչյուր քայլին եւ մեծ համբերութեամբ սպասում է, թե երբ ենք ջանքեր գործադրելու՝ իր հետ ավելի մտերիմ լինելու համար, թե երբ ենք ջանքեր գործադրելու, որ հասկանանք, թե ի՞նչ է ինքը ուզում մեզանից, թե ո՞րն է իր կամքը: Գուցե, ոչ թե Աստված է անտարբեր, այլ մե՞նք ենք թերանում Աստծո հանդեպ մեր պարտավորութիւնների մեջ, չէ՞ որ ոչ միայն ծնողն է պարտական գավակի հանդեպ, այլեւ, նախեւառաջ, գավակը՝ ծնողի հանդեպ: Ուրեմն, ի՞նչ է ուզում մեր Ծնողը, մեր Արարիչ Հայրը մեզանից՝ իր գավակներից:

Հայր Աստծո կամքն է՝ յուրաքանչյուրիս ազատագրումը մեղքի գերութիւնից եւ յուրաքանչյուրիս սրբութիւնը, որի մեջ է կայանում մեր երջանկութիւնը եւ ներքին խաղաղութիւնը՝ այս կյանքում եւ հավիտենական կյանքում՝ Տիրոջ հետ միասին:

Աստված ի սկզբանէ այս ամենը սահմանել է մարդ արարածի համար՝ որպէս մարդկային կյանքի իմաստ եւ առաքելութիւն:

Աստված նաեւ սահմանել է, որ մեր սրբութեանը եւ փրկութեանը հասնենք իր Միածին Որդու՝ Տեր Հիսուս Քրիստոսի եւ Նրա հիմնած Մեկ, Սուրբ Կաթողիկէ Եկեղեցու միջոցով, որը մարդկութեան համար Նոյան տապանի նման մի նավ է, որի նավապետը ինքը Քրիստոսն է եւ որի մեջ մենք կարող ենք փրկվել այս աշխարհի մեղքի ջրհեղեղից եւ հավիտենական դժոխքի կրակից:



Աստված Ի՛նքն է կամեցել, որ մարդն այս կյանքում ընդունի Իր աստվածային օրհնությունները, լինի երջանիկ եւ փրկութեան հասնի՝ բայց ոչ թե առանձին, մենակ ազդեցելով, ոչ թե միայն իր բարեկամների հետ մատաղ անելով եւ սեղան նստելով, ոչ թե միայն մկրտվելով, պսակվելով եւ հետո եկեղեցի չհաճախելով, այլեւ լիապէս ապրելով՝ որպէս Քրիստոսի Եկեղեցու ջերմեւանդ անդամ, միասին՝ ազդեցելով Քրիստոսի բոլոր եղբայրների եւ քույրերի հետ, այսինքն՝ իր ընտանիքի անդամների հետ, իր ընկերների, հարեւանների, համագյուղացիների, համաքաղաքացիների հետ միասին, նաեւ՝ նրանց հետ, ում հետ տարածայնություններ կան, անծանոթների հետ միասին, որովհետեւ Աստված սիրում է իր բոլոր զավակներին եւ բոլորի՛ն է հրավիրում եկեղեցի՝ միասնաբար ներկա լինելու Իր Սուրբ Սեղանի շուրջ եւ հարստնալու իր Իր աստվածային ներկայութեան հոգեւոր գործութեամբ, ճիշտ ինչպէս իր առաքյալներին հրավիրեց Վերնատուն՝ Խորհրդավոր ընթրիքին եւ նրանց հետ կիսեց հացը եւ բաժակը՝ դրանք դարձնելով Իր Մարմինն ու Արյունը անտեսանելի, խորհրդավոր կերպով։ Ըիշտ առաքյալների պէս հացի եւ գինու տեսքով ճաշակելով Տեր Հիսուս Քրիստոսի Մարմինն ու Արյունը՝ մեր մեջ ենք ընդունում Քրիստոսի ներկայութեանը, եւ նրա միջոցով՝ ամբողջ Սուրբ Երրորդութեան ներկայութեանը։ Աստված բնակվում է մեր մեջ, իսկ մենք՝ Աստծո մեջ, ըստ Քրիստոսի խոսքի, որն անվիճելի է եւ ճշմարիտ։ Եկեղեցում Սուրբ Սեղանի մոտ հավաքվելիս՝ մենք յուրաքանչյուրս, ճաշակելով Քրիստոսի Մարմինն ու Արյունը՝ միանում ենք ոչ միայն Քրիստոսին, այլեւ՝ միմյանց, որովհետեւ սնվում ենք նույն Քրիստոսով, Նրա միեւնույն Սուրբ Մարմնով եւ Արյամբ, որի մեջ ներկա է Աստված ճշմարտապէս, բոլորս լցվում ենք աստվածային նույն ներկայութեամբ, դառնում ենք մեկ հոգեւոր մարմին՝ ոչ միայն Քրիստոսի հետ, այլեւ՝ միմյանց հետ։ Ուրեմն, հավաքվելով Տիրոջ Սեղանի շուրջ եւ ճաշակելով Նրա Սուրբ Մարմինն ու Արյունը, բոլոր քրիստոնյաները միմյանց հետ կապվում ենք նույն հոգեւոր կապով՝ հարազատութեամբ, դառնում են Քրիստոսի եղբայրները եւ քույրերը՝ ըստ Տիրոջ կամքի, դառնում են Քրիստոսի նույն հոգեւոր կամ խորհրդավոր Մարմնի անդամները։ Սուրբ Պողոս առաքյալը, որ մինչեւ դարձի գալը հալածում էր Քրիստոսի Եկեղեցին, երբ դարձավ Քրիստոսի առաքյալ, իր հիմնած առաջին համայնքներին գրում էր․

«Ինչպէս որ մարմինը մեկ է եւ բազում անդամներ ունի, եւ մարմնի բոլոր անդամները, որ բազում են, մեկ մարմին են կազմում, այդպէս է նաեւ Քրիստոսը, որովհետեւ մենք ամենքս՝՝ հրեա, թե հեթանոս, ծառա, թե ազատ, մեկ Հոգով մկրտվեցինք՝ մեկ մարմին կազմելու համար, եւ ամենքս էլ նույն Հոգուց խմեցինք», Ա Կորնթ. 12, 12։

Եկեղեցում ի մի հավաքվելով՝ մենք ստանում ենք նույն Սուրբ Հոգին, որը մեզ սովորեցնում է․
 -առավել լավ հասկանալ Աստծուն եւ մեր կյանքի իմաստը,
 -ավելի շատ սիրել Աստծուն,
 -դարձնում է խոնարհ՝ հասկանալու մեր մեղքերը եւ զղջալու դրանց համար,
 -դարձնում է ուժեղ՝ պայքարելու մեղքի դեմ, ապրելու սուրբ, աստվածահաճո կյանքով, սիրելու ուրիշներին՝ որպէս քույրերի եւ եղբայրների, լինելու ներողամիտ, ապրելու միասնաբար՝ որպէս Աստծո մեկ ժողովուրդ, որպէս կենդանի Եկեղեցի՝ հոգեւոր ամենօրյա գործունյա ավյունով։
 Իսկ միայնակ ազդեցելով, տանը մնալով եւ միայն առօրյա գործերով զբաղվելով՝ այս ամենն ունենալն անհնարին է, եւ մեղքի մեջ ակամայից ընկնելը՝ շատ հեշտ։

Այսպէս՝ միանական ազդեցով, Տիրոջ Սուրբ Խորանի առջեւ եւ Սուրբ Սեղանի շուրջ հավաքվելով կազմավորվել եւ այսօր էլ շարունակում է կայանալ Քրիստոսի Եկեղեցին, որն, ուրեմն, պետք է հասկանանք ոչ թե միայն քարե շինութեան իմաստով, այլ՝ իր բուն՝ հոգեւոր իմաստով՝ որպէս Հիսուս Քրիստոսին եւ Աստծուն հավատացողների խումբ, ընտանիք, որպէս Քրիստոսի խորհրդավոր, հոգեւոր Մարմին։

Այս պատճառով է անհրաժեշտ եւ պարտադիր յուրաքանչյուրիս համար՝ մեր ազդեցը կատարել ոչ միայն առանձին, այլեւ՝ միասին եւ, հատկապէս, Սուրբ Պատարագի ժամանակ՝ հաղորդվելով Տիրոջ Մարմնին եւ Արյանը՝ որպէս Քրիստոսի հոգեւոր Մարմնի՝ Եկեղեցու լիարժեք անդամներ, որ չեն ապրում առանձին Գլխից, որ Հիսուսն է, եւ զաստված մյուս անդամներից։

Ուրեմն, միասնական ազդեցին չմասնակցելով՝ մենք մասնատում ենք Տիրոջ Եկեղեցին, քայքայում Տիրոջ ընտանիքը, վարվում եսասիրաբար եւ մեղք ենք գործում Աստծո եւ միմյանց դեմ։

Իսկ եթե ձեզանից մեկը խնդիր ունի քահանաների հետ եւ չի ուզում նրանց հետ շփվել, ապա միշտ պետք է մտածել, որ եկեղեցին միայն քահանաները չեն, այլ Եկեղեցին նախ Քրիստոսն է, ապա՝ դուք եւ բոլոր մկրտվածները՝ ներառյալ քահանաները, եւ ոչ ոք՝ որպէս մարդ, գերծ չէ թերություններից եւ մեղքերից։ Չի կարելի երես թեքել Քրիստոսից, Նրա Եկեղեցուց եւ մեղք գործել՝ մարդկանց հետ խնդիր ունենալու կամ մարդկանց թերությունները նկատելու պատճառով։ Հիսուսն ասում է․



«Ինչու՞ եղբորդ աչքի միջի շյուղը տեսնում ես, իսկ քո աչքի միջի գերանը չես նկատում... Կեղծավոր, նախ այդ գերանը հանիր քո աչքից, որ կարողանաս հստակ տեսնել եւ ապա կհասնես շյուղը՝ եղբորդ աչքից», Մտթ. 7, 3-5:

Մենք բոլորս իրավունք ունենք եւ լիովին ազատ ենք՝ մեր կարծիքները եւ պատկերացումները ունենալու ցանկացած հարցի շուրջ՝ նաեւ հոգեւոր ոլորտում, բայց երբ մկրտվում ենք եւ ինքներս մեզ հայտարարում ենք «քրիստոնյա», ապա պետք է հասկանանք, որ քրիստոնյա լինել՝ նշանակում է կրել Քրիստոսի անունը, իսկ դա էլ նշանակում է այն, որ մարդը ինքն իրեն համարում է Քրիստոսի հետեւորդ՝ Նրա ուսուցումների, Նրա կյանքի օրինակի հետեւորդ եւ պետք է պարտավորված զգա՝ կատարելու այն ամենը, ինչ գրված է Տիրոջ Ավետարանում եւ ինչ որ սովորեցնում է Քրիստոսի Եկեղեցին՝ հոգեւոր սպասավորների միջոցով: Իսկ Քրիստոս պատվիրեց իր աշակերտներին՝ միշտ աղոթել ոչ միայն առանձին, այլեւ՝ միասին եւ միշտ կատարել Սուրբ Պատարագը, նույն Սեղանի շուրջ ճաշակել իր Մարմինն ու Արյունը եւ այդպես հիշել այն Իր խաչելութունը, մահը եւ հարությունը (Ա Կորնթ. 11, 23-27):

Քրիստոսի առաքյալների հաջորդները դարերի ընթացքում եղել են եպիսկոպոսները եւ քահանաները, որոնք շարունակել են մատուցել Տիրոջ Սուրբ Պատարագը եկեղեցում, Քրիստոսի բառերով սրբազործել հացն ու գինին եւ Տիրոջ Մարմինն ու Արյունը բաշխել Տիրոջ ժողովրդին: Ոչ միայն նրանք, այլեւ բոլոր քրիստոնյաները Տիրոջ կողմից հրավիրված են մասնակցելու ընդհանուր աղոթքներին եւ Սուրբ Պատարագին, հետեւաբար, ներկա չլինել Պատարագին՝ նշանակում է գիտակցաբար չկատարել Քրիստոսի պատվիրանը, ինչը ծանր մեղք է եւ ենթակա է արձակման՝ միայն Խոստովանություն կատարելու միջոցով:

Վստահ եմ, որ այս ամենը խորապես հասկանալով՝ չպիտի ուզենաք շարունակել ապրել մեղքի մեջ, եւ հիմա, երբ կարդացիք եւ գիտեք, առավել եւս ծանր մեղք կհամարվի ձեզ համար, եթե հեռու մնաք Սուրբ Պատարագից եւ շարունակեք ձեր նախկին ընթացքը:

Ի վերջո, շաբաթվա մեջ, գոնե, մեկ ժամ Աստծուն նվիրելը եւ Սուրբ Պատարագին մասնակցելը նաեւ հիմնված է Տասը պատվիրաններից 3-րդի վրա՝ «Տիրոջ օրը սու՛րբ պահիր»: Հրեաների համար այդ օրը սահմանվեց շաբաթ օրը, իսկ մեզ համար շաբաթ օրվանից բացի առավել կարեւոր է կիրակին, քանի որ Հիսուս Քրիստոս հարություն առավ կիրակի օրը: Սուրբ պահել օրը՝ նշանակում է՝ հանգստանալ առօրյա բոլոր գործերից եւ օրն անցկացնել աղոթքով, Սուրբ Գիրք ուսումնասիրելով եւ բարեգործություններով: Հասկանալի է, որ, մանավանդ, գյուղում պետք է միշտ կատարել նաեւ անհրաժեշտ շատ աշխատանքներ, որոնք կարեւոր են ընտանիքի համար: Սա թույլատրելի է նաեւ Սուրբ Գրքով (Ելք 12, 6), բայց նաեւ աշխատանքի մեջ, այդ օրերին, մանավանդ, կիրակի, բոլորս պարտավոր ենք, գոնե, մեկ ժամ նվիրել Աստծուն եւ գնալ եկեղեցի՝ աղոթելու բոլորի հետ միասին, խոստովանելու մեր մեղքերը, հաղորդվելու Տիրոջ Մարմնին եւ Արյանը՝ որպես շնորհակալություն արտահայտություն աշխատանքի, բարիքների եւ ընտանիքի առողջության համար: Վստահ եմ, որ ձեր դժվարությունների մեջ շատ բաներ կան, որոնց համար պետք է շնորհակալություն հայտնել Տիրոջը: Իսկ շնորհակալության լավագույն ձեւը Սուրբ Պատարագին մասնակցելն է:

Սիրելի՛ հավատացյալներ, Տեր Հիսուս Քրիստոս միշտ խոսում է սիրով, բայց՝ կտրուկ եւ հստակ, նույնիսկ, եթե Նրա խոսքերը վիրավորում են մարդուն եւ մտահոգություն առիթ դառնում, որովհետեւ Տիրոջ նպատակը մարդկանց բուժելն է, սթափեցնել է՝ հոգեւոր անտարբերությունից, իսկ բուժական միջամտությունները նախ ցավեցնում են, հետո՝ բուժում: Նույնն է նաեւ մեր՝ քահանաներիս, նպատակը եւ պարտականությունը: Մենք պարտավոր ենք որպես Տիրոջ կողմից կարգված պահակներ եւ հոգեւոր ուղեկիցներ, առաջնորդներ, զգուշացնել ձեզ, որ կատարեք ձեր հոգեւոր պարտականությունները եւ փրկեք ձեր հոգիները, ուղղեք ձեր ընթացքը եւ վայելեք Տիրոջ օրհնությունները ձեր եւ ձեր ընտանիքների համար:

«Մենք մեզ չէ՛, որ քարոզում ենք, այլ՝ Հիսուս Քրիստոսին՝ Տիրոջը, իսկ մեզ՝ որպես ձեր ծառաների՝ ի սեր Քրիստոսի: Որովհետեւ Աստված, որ ասաց, թե «Խավարից թող լույս ծագի», հենց Ինքը ծագեց մեր սրտերում, որպեսզի լուսավորվենք Աստծու փառքի գիտությունով, որ ճառագայթում է Հիսուս Քրիստոսի դեմքից», Բ Կորնթ. 4, 5-6:

Խորապես շնորհակալ եմ բոլոր նրանց, ովքեր այս ամենը գիտակցում են եւ կանոնավոր կերպով ներկա են միասնական աղոթքներին եւ Սուրբ Պատարագին:

Հասկանում եմ նաեւ նրանց, ովքեր այս օրերին ժամանակավորապես ընդհանուր աղոթքներին ներկա չեն՝ համաճարակի տարածումը կանխելու պատճառով: Կարոտով կսպասեմ ձեզ հետ հանդիպմանը եւ միասին աղոթելուն:

Տ. Հովսեփ՝ ձեր խոնարհ ծառան՝ ի սեր Քրիստոսի
Հունիս, 2020



Հիսուսի Սուրբ Սրտի պաշտամունքը

«Ահա՛ Սիրտը, որը այդքան սիրեց մարդկանց եւ չխնայեց իրեն մինչեւ վերջ...»

Հունիս ամսին Հայ Կաթողիկէ Եկեղեցում սովորութիւնն է՝ կատարել հատուկ աղոթքներ՝ նվիրված Հիսուսի Սուրբ Սրտին: Մեծ Սեպտեմբերի Սուրբ Փրկիչ Եկեղեցու արեւելյան պատին եւս կա Սուրբ Սրտի որմնաքանդակը, որն արվել է 1990-ականներին եւ, անշուշտ, գոյություն ունի ավանդական բարեպաշտութեան գոյութեան մի վկայութիւնն է:

Հիսուսի Սուրբ Սրտի հանդէպ այս գեղեցիկ ջերմեռանդութիւնը սկիզբ է առել Արեւմուտքում՝ միջին դարերում եւ մուսք գործել նաեւ Հայ կաթողիկէ համայնքներ շատ վաղ՝ հատկապէս, Մխիթարյան միաբանութեան հայրերի ջանքերով:

Ի՞նչ է Հիսուսի Սուրբ Սրտի քերմեռանդությունը. համառոտ

Ի սկզբանէ Եկեղեցին խորին հարգանք է տածել մարդկութեան նկատմամբ Քրիստոսի զոհաբերական սիրո հանդէպ: Այդ հարգանքն արտահայտվել է տարբեր խորհրդանիշներով. վաղ միջնադարում եղել է Բարի Հովիթի կերպարը, միջին դարերում Քրիստոսի հինգ վերքերի եւ փշե պսակով թագադրված պատկերի պաշտամունքը: Այդ ժամանակ էլ ի հայտ եկավ Հիսուսի Սուրբ Սրտի պաշտամունքը: Այս ջերմեռանդութեան հետքերը հիմնականում կարելի է հայտնաբերել Սաքսոնիայի XIII դարի ցիստերցիան միանձնուհիների վանքերում, միջին դարերի սրբերի կենսագրութիւններում, դոմինիկյան, ֆրանցիսկյան եւ կարտեզյան միաբանութիւնների գործունեութեան մեջ: Եկեղեցական կյանքում Հիսուսի Սուրբ Սրտի պաշտամունքը լայնորեն տարածվեց նոր ժամանակներում՝ 18-րդ դարից սկսած:

Դեռեւս Լյուդովիկոս XIV-ի ժամանակաշրջանի ֆրանսիացի քահանա Սուրբ Ժան Էդը՝ հոգեւոր առաջնորդների թուլութեամբ, առաջին անգամ 1672թ. մատուցեց Հիսուսի Սրտին նվիրված Սուրբ Պատարագ: Հենց նա էլ հանդիսանում է Ֆրանսիայում Հիսուսի Սրտի պաշտամունքի ավանդույթի հիմնադիրը:

Հիսուսի Սրտի պաշտամունքի տարածման գործում մեծ դեր են խաղացել միանձնուհի Մարգարիտա Մարիա Ալաբոքի պատմութիւնները՝ Հիսուսի երեւումների մասին: Տեր Հիսուսը նրան հայտնվել է 1675թ. Տիրոջ Մարմնի տոնին եւ պատվիրել հաստատել իր Սրտին նվիրված տունը: Քույր Ալաբոքին աջակցում էր իր խոստովանահայր հիսուսյան Հայր Կլոդ դե լա Կոլմբեն: 1684թ.-ին լույս տեսավ Կոլմբեի գիրքը՝ Մարգարիտա Մարիայի երեւումների նկարագրութեամբ, իսկ 1691թ.՝ Մարգարիտա Մարիայի կենսագրութիւնը, որը պատկանում էր հիսուսյան ժաննա Կրուակեի գրչին: 1698թ. Ալաբոքը գրեց եւ հրատարակեց իր սեփական գիրքը՝ Հիսուսի Սուրբ Սրտի պաշտամունքի մասին: Դրանք բոլորն էլ մեծ հեղինակութիւն էին վայելում ֆրանսիական հոգեւորականութեան շրջանում:

Հիսուսի Սուրբ Սրտի պաշտամունքը ընդլայնվում էր, ի հայտ էին գալիս բազմաթիւ եղբայրութիւններ՝ նվիրված «Հիսուսի Սրտին»: Առաջին հրատարակային երկրպագութիւնը Հիսուսի Սրտին եւ համընդհանուր նվիրումը արձանագրվել է 1720թ., Մարսելում՝ ժանտախտի համաճարակի ժամանակ:

1856թ. Պիոս IX Պապը հռչակեց Հիսուսի Սրտի պաշտամունքը՝ որպէս պարտադիր բոլոր կաթողիկէ եկեղեցիների համար:

1899թ. հունիսի 11-ին Լեոն XIII Պապը ամբողջ մարդկութեանը աղոթքով նվիրաբերեց Հիսուսի Սուրբ Սրտին՝ դա համարելով իր ամենալավ գործը: Այդ նվիրաբերութեան համար նրան խնդրել էր Սուրբ Սրտի միանձնուհի Մարիան՝ Բարի Հովիթ միաբանութիւնից՝ պնդելով, որ դա Տեր Հիսուս Քրիստոսի խնդրանքն է իրեն: Նա մահացավ հենց Սուրբ Սրտի տոնի օրը: Լեոն XIII-րդը նաեւ հաստատեց Հիսուսի Սուրբ Սրտի Պատարագ, որը այսուհետ պետք է մատուցվեր յուրաքանչյուր ամսվա առաջին ուրբաթ օրերին:

XX-րդ դարի երկրորդ կեսին՝ Եվրոպային բաժին հասած ծանրագույն ժամանակաշրջանում, Հիսուսի Սրտի պաշտամունքը դարձավ առավել հայտնի: Սրբացվեցին Հիսուսի Սրտի պաշտամունքի նախակարապետները՝ քույր Մարգարիտա Մարիա Ալաբոքը՝ 1920թ., Հայր Ժան Էդը՝ 1925թ., իսկ Հայր Կլոդ դե լա Կոլմբեն դասվեց երանելիների շարքը՝ 1992թ.: Պիոս XII Պապը 1956թ.-ին մի հատուկ կոնդակ նվիրեց Հիսուսի Սուրբ Սրտի պաշտամունքին:

Սուրբ Սրտի տասներկու խոստումները

Գոյութիւն ունի Հիսուսի Սուրբ Սրտի տասներկու խոստումների մի ցանկ, որի կազմողի անունը հայտնի է, բայց, ըստ ավանդութան, այդ ցանկը հիմնված է Փրկչի կողմից Սուրբ Մարգարիտա Մարիա Ալաքոքին տրված հայտնութիւնների վրա: Այդ խոստումների տեքստը վստահելի է, քանի որ դրանցում արտահայտված են սրբուհու գրառումները:

Ահա եւ ցանկը, որին ավելացրել ենք հղումներ՝ սուրբ Մարգարիտա Մարիայի տեքստերից.

1. Իմ Սուրբ Սիրտը պաշտողներին Ես՝ համաձայն նրանց կյանքի հանգամանքներին, տալիս եմ անհրաժեշտ շնորհներն ու օգնութիւնը (Նամակ №141):
2. Նրանց ընտանիքներում Ես կհաստատեմ ու կպահպանեմ խաղաղութիւն (Նամակ №35):
3. Ես կմխիթարեմ նրանց վշտի մեջ (Նամակ №141):
4. Ես նրանց համար կլինեմ ապահով ապաստան, հատկապէս մահվան ժամանակ (Նամակ №141):
5. Ես առատ օրհնութիւններ կբաշխեմ նրանց բոլոր աշխատանքներին եւ նախաձեռնութիւններին (Նամակ №141):
6. Մեղավորները Իմ Սրտի մեջ կգտնեն անսահման ողորմածութիւն (Նամակ №132):
7. Շնորհիվ բարեպաշտութեան այս ձեւի՝ գաղջ հոգիները կդառնան նախանձախնդիր (Նամակ №132):
8. Նախանձախնդիր հոգիները արագ կհասնեն կատարելութեան բարձրունքների (Նամակ №132):
9. Իմ օրհնութիւնը կլինի այնտեղ, որտեղ կպաշտեն Իմ Սուրբ Սրտի պատկերը (Նամակ №135):
10. Բոլոր նրանց, ովքեր աշխատում են հոգիների փրկութեան համար, Ես տալիս եմ ամենակարծր հոգիները դարձի բերելու շնորհ (Նամակ №141):
11. Նրանց անունները, ովքեր տարածում են բարեպաշտութեան այս ձեւը, ընդմիշտ կդրոշմվեն Իմ Սրտում (Նամակ №141):
12. Բոլոր նրանց, ովքեր ինն ամիս շարունակ առաջին ուրբաթ օրերին կհաղորդվեն Իմ Մարմինն եւ Արյանը, Ես տալիս եմ հավատը մինչեւ վերջ պահելու եւ հավիտենական փրկութիւն ձեռք բերելու շնորհ (Նամակ №86):

Թարգմանեց եւ պատրաստեց՝ Նաիրա Բաղդասարյանը

Հիսուսի Սուրբ Սրտից՝ խաղաղություն մեր սրտերին



«Եւ նա Հիսուսի կրծքին ընկնելով՝ հարցրեց նրան. «Տեր, ո՞վ է»,
Հվհ. 13, 25

Հովհաննեսի ավետարանի 13-րդ գլխում, ոտնվայի խորհրդավոր տեսարանից հետո Հիսուս իր աշակերտներին ասաց. «Ճշմարիտ, ճշմարիտ եմ ասում ձեզ, որ ձեզանից մեկն ինձ մատնելու է»: Աշակերտները իրար էին նայում՝ մտածելով, թե ով է մատնիչը: Նրանք ոչ միայն կասկածում էին միմյանց, այլեւ, ներքուստ, հավանաբար, մտածում էին, թե գուցե, հենց իրենք են մատնիչը: Այդ միտքը չէր կարող չտանջել աշակերտներին, որ կիսել էին Հիսուսի առաքելութիւնը, տեսել Նրա սրբութիւնը, հավատացել Նրան, սովորել Նրանից, բայց նաեւ ներքուստ հասկանում էին, թե որքա՛ն թույլ են իրենք՝ առանց Հիսուսի, հասկանում էին, թե որքա՛ն մեղավոր են իրենք Հիսուսի առջեւ, թե որքա՛ն փխրուն է իրենց հավատքը եւ քաջութիւնը, նույնիսկ, Հիսուսի ներկայութեամբ: Հիշենք՝ ինչպէս էին նրանք վախեցել, երբ նավարկում էին փոթորկված ծովում, մինչդեռ Հիսուս իրեց հետ էր եւ քնած

էր նավակի մեջ, ինչպէս Պետրոսը վախեցավ՝ ջրի վրա քայլելիս՝ դեպի Հիսուսը, թե ինչպէս նույն Պետրոսը, որ պատրաստ էր իր կյանքը տալ Հիսուսի համար (Հվհ. 13, 37), երեք անգամ ուրացավ նրան, եւ թե ինչպէս բոլոր աշակերտները թողեցին Հիսուսին եւ փախան մատնութեան գիշերը եւ այլ բազում դրվագներ, երբ Հիսուս նախատում էր իրենց՝ չտարբերելու համար կարեւորը երկրորդականից: Նրանք հասկանում էին սեփական

Թուլութիւնը եւ վախենում էին դրանից, մանավանդ, Պետրոսը, որ այնքա՛ն սիրում էր Տիրոջը, եւ իրեն տանջում էր այդ միտքը, թէ մատնիչը կարող է լինել եւ ինքը: Հենց Պետրոսը նշան արեց Հովհաննէսին, «որին Հիսուսը սիրում էր եւ որը նստել էր նրա մոտ», ինչպէս կարդում ենք ավետարանում, իմանալ, թէ ով է մատնիչը: Եվ Հովհաննէսը «Հիսուսի կրծքին ընկնելով՝ հարցրեց նրան. «Տեր, ո՞վ է», Հվհ. 13, 25: Հովհաննէսն ինքն էլ տանջվում էր եւ ուզում էր այդ հարցի պատասխանը իմանալ, որովհետեւ Հիսուս սիրում էր իրեն յուրահատուկ կերպով եւ պետք է մտածենք, որ իր ամենամեծ փափագն էր հանկարծ չվշտացնել վարդապետին եւ չվիրավորել նրա սերը իր հանդէպ:

Եկե՛ք ավելի հանգիստ մտածենք այս վսեմ պատկերի մասին՝ Հովհաննէսը հենվեց Հիսուսի կրծքին. այդպէս անելով՝ Հովհաննէսը նախ ուզեց օգտվել իր «արտոնյալ վիճակից» եւ իմանալ բոլորին ամենաշատ տանջող այդ հարցի պատասխանը, բայց նախեւառաջ՝ իմանալ, թէ արդյոք ինքը չէ այդ մատնիչը:

Տեսե՛ք, թէ ինչպէ՛ս է ուզում իմանալ Հովհաննէսը՝ Տիրոջ կրծքին ընկնելով: Սա պարզապէս սիրո մի արտահայտութիւնն է. Հովհաննէսն ինքն իրեն ամբողջովին հանձնեց Տիրոջ Սուրբ Սրտին, իր ողջ կյա՛նքը վստահեց Տիրոջ սիրույն, Տիրոջ բարութեանը, անսահման համբերատարութեանը: Հիսուսի Սուրբ Սրտի Լիթանիայում աղոթում ենք. «Սիրո Հիսուսի, լի բարութեամբ եւ սիրով... երկայնամիտ եւ բազումողորմ», ըստ սաղմոսի խոսքերի: Հովհաննէսն իր թույլ, իր մեղավոր մարդկային բնութիւնը ամբողջովին դրեց Տիրոջ կրծքին, մոտեցրեց Տիրոջ Սուրբ Սրտին, որպէսզի Տերն օգնի նախեւառաջ իրեն՝ երբեք չզնայ մատնութեան: Հովհաննէսը հասկանում էր, որ ի՛նքը կարող էր լինել առաջին մատնիչը եւ իր հարցի պատասխանը իմանալուց առավել՝ ուզում էր նախ ինքն իրեն հանձնել Տիրոջ կամքին, Տիրոջ պաշտպանութեանը, որպէսզի այդ հարցադրման պատասխանի մեջ երբեք չլիներ իր անուշը, որ Տերը նախապէս ներելով իրեն՝ հետ պահէր իրեն այդ անավոր սխալը գործելուց, որ Տերը բուժէր իր բոլոր թուլութիւնները. չէ՞ որ Տերն ամեն ինչ գիտեր: Մեզանից յուրաքանչյուրս սիրելի ենք Հիսուսի համար, ինչպէս Հովհաննէսը: Երբ երկմտում ենք, վախենում ենք կամ խռովված ենք, եկե՛ք փարվենք Տիրոջ Սուրբ Սրտին, որտեղ լիառատ սփոփանք եւ խաղաղութիւն կա՛ բոլորիս համար:

Հիսուսի Սուրբ Սրտից խաղաղվում են մեր սրտերը.

«Թող չխռովվեն ձեր սրտերը, հավատացե՛ք Աստծուն, հավատացե՛ք եւ ինձ», Հվհ. 14, 1:

Տ. Հովսէփ Գալստյան
1 հունիսի, 2020

Տիրոջ Սուրբ Սիրտը՝ «բորբոքեալ հնոց սիրոյ»



Տիրոջ Սուրբ Սիրտը «սիրո բորբոքեալ հնոց» է, ինչպէս աղոթում ենք Սուրբ Սրտի Լիթանիայում, մի հնոց, որից Տերը սիրո հուր գցեց այս աշխարհի վրա, ըստ Իր խոսքերի. «Երկրի վրա կրակ գցելու եկա, եւ որքա՛ն եմ ուզում, որ արդեն իսկ բորբոքված լիներ», Ղվ. 12, 49:

Սիրո հուրը ճարակել է Տիրոջ Սուրբ Սիրտը եւ սպառվել (Յվհ. 13, 1) մարդու համար՝ առանց ավարտվելու, առանց այրվելու, ինչպէս Քորեբ լեռան վրա Տիրոջ հրաբորբ ներկայութիւնից այրվում էր եւ չէր մոխրանում անկեզ մորենին, որին մոտեցավ Մովսեսը (Ելք 3): Նա հանեց իր կոշիկները, տեսավ Տիրոջ ամենաճարակ սիրո հուրը, շլացավ հրեղեն լույսով, ընդունեց այն իր սրտի մեջ, խանդավառվեց այդ հրով եւ բոցավառվեց ամբողջ էութեամբ, սրտով ու մտքով եւ գնաց այդ հուրը փոխանցելու Տիրոջ ժողովրդին, այդ հրով առաջնորդեց նրանց անապատի միջով՝ մինչեւ երկիրն ավետեաց: Այդ հուրը Արարիչն Հայր Աստծո՛ւ մարդու նկատմամբ ծնողական ի սպառ սիրո հուրն էր, որ ճարակեց Մովսեսին եւ ուղարկեց նրան՝ այդ հուրը տարածելու՝ որպէս սիրո հրձիգ. երբ Մովսեսն իջնում էր Սինա լեռան վրայից, նրա դեմքը ճառագում էր լույսերով, եւ նա քողարկում էր, որ ժողովուրդը չսարսափի այդ տեսարանից (Ելք 34, 29-35): Աստծո սիրո հուրը պահանջկոտ է. այն պահանջում է նույնպիսի ի սպառ, ինքնագոհաբերութեան պատրաստ փոխադարձ սեր՝ Աբրահամի նման, եւ կտրուկ հրաժարում մեղավոր կյանքից, ինչին իսրայելացիները պատրաստ չէին, իսկ մե՞նք...



Աստված իր ժողովրդին մշտապես հրավիրում է իր հետ մտերմիկ զրույցի, ինչպես Մովսեսին, ում հետ «խոսում էր շրթունք-շրթունքի, բացահայտ եւ ոչ թե առականերով» (Թվ. 12, 8). սա զրույց է Սրտից դեպի սիրտը, ինչպես մեկը կխոսի իր բարեկամի հետ, բացատրում է Սուրբ Գիրքը:

Հիսուս իր Սուրբ Սրտի սիրո հրով ուղեկցում էր Տիրոջ ժողովրդին անապատում, լուսավորում էր գիշերվա խավարի մեջ, որ նրանք կարողանային առաջ ընթանալ (Ելք 13, 21-22):

Այդ նույն սիրո հրով Տերը մաքրեց Եսայի մարգարեի շուրթերը, որոնք պիտի քարոզեին ապաշխարություն՝ մեղավոր ժողովրդին. «Եւ ահա ինձ մոտ ուղարկվեց սերովբեներից մեկը՝ ձեռքին այրվող ածուխ բռնած, որ ունեւիրով վերցրել էր զոհասեղանից: Բերեց դիպցրեց իմ բերանին եւ ասաց. «Ահա՛ այդ դիպավ քո շուրթերին. դա կհանի քո անօրենությունները, եւ քո մեղքերը կսրբի քեզանից»», Ես. 6, 6:

Տիրոջ Սրտից բխող սիրո հուրը Տիրոջ Խոսքն է, որ առաջնորդում է իր ժողովրդին, Տիրոջ սրտից խոսում է իր ժողովրդի սրտի հետ, Տիրոջ շրթունքներից հոսում է առատորեն իր սիրելիների շրթունքների մեջ, մաքրում պղծություններից եւ ուղարկում առաքելության՝ արիաբար տարածելու այդ սերը եւ Աստծո Խոսքը:

Սուրբ Սրտի հրավառ սիրո պատկեր է ներկայացնում նաեւ այն կրակի հնոցը, որտեղ նետվեցին Դանիելի երեք ընկերները, որոնք հնոցում իրենց աղոթքի մեջ ապաշխարեցին Իսրայելի ամբողջ ժողովրդի փոխարեն՝ իրենք իրենց մատուցելով որպես ողջակեզ՝ որպես նախապատկեր Աստծո Որդու ողջակեզման՝ Խաչի վրա. «Թող այդպես լինի մեր զոհաբերությունն այսօր՝ քո առաջ՝ կատարյալ լինելու... որովհետեւ քեզ հուսացողներս ամոթով չենք մնում: Արդ գալիս ենք քո հետեւից ամբողջ սրտով...», Դն. 3, 40-41:

Տեր Հիսուս Քրիստոսն Ինքը իջավ այդ հնոցի մեջ՝ մեզ բացատրելու համար իր՝ սիրո հնոցում այրվելու իմաստը. ապշած Նաբուգոդոնոսորը բացականչեց. «Ես տեսնում եմ արձակված չորս մարդու, քայլում են կրակի մեջ եւ ոչ մի վնասվածք չկա նրանց վրա, իսկ չորրորդի տեսքը նման է Աստծո Որդուն», Դն. 3, 92: Այդ երեք երիտասարդները Տիրոջ սիրո հնոցում ապաշխարեցին նաեւ չարի մարմնավորում Նաբուգոդոնոսորի համար, եւ սա դարձի եկավ:

Տեր Հիսուս Քրիստոսի սիրո հրի մեջ Տիրոջ հետ միասին քայլելը ապաշխարություն է, նոր կյանքի սկիզբ եւ ճշմարիտ մկրտություն, ինչպես գոչում էր Հովհաննես Մկրտիչը. «...նա ով գալիս է ինձնից հետո... կմկրտի ձեզ Սուրբ Հոգով եւ հրով», Մտթ. 3, 11:

Հիսուս՝ իր սիրո կրակով է ամեն ինչ համեմուծում, մաքրագտում. «ամեն ինչ կրակով պիտի աղվի», Մրկ. 9, 49:

Եվ ի վերջո, Ի՛նքն իսկ այրվում է իր ի սպառ սիրո հնոցի մեջ՝ տառապանքների, Գողգոթայի ճանապարհի հնոցի մեջ, բարձրանում է Խաչի հնոցը, որից դուրս է գալիս անվնաս. ինչպես հնոցից դուրս բերեց երեք երիտասարդներին, այդպես էլ Հայր Աստված իր Որդուն դուրս բերեց որդիական ինքնանվեր սիրո հնոցից՝ անվնաս, անապական, հարուցյալ, փառավորյալ մարդկային Մարմնով եւ Քրիստոսի խորհրդավոր Մարմնի հետ միասին եւ այդ Մարմնի մեջ, որ Եկեղեցին է, մեր բոլորիս մարդկային մարմիններն անցկացնելով իր հայրական սիրո հնոցի միջով եւ հրով աղելով դրանք՝ դուրս է բերելու հաղթական այս աշխարհում եւ անապական հարուցյալ մարմիններով՝ Ահեղ դատաստանից հետո:

Ուստի սիրելիներ՛ր, եկե՛ք ինքներս մեզ ամբողջ սրտով, մտքով, էությամբ եւ զորությամբ նետե՛նք Տիրոջ եւ մարդու հանդեպ ի սպառ կիզող սիրո հնոցը, որպեսզի Տիրոջ հետ միասին դուրս գանք՝ սրբազործված, համեմված, վերանորոգ մարդկային սրտով՝ նման Հիսուսի Սուրբ եւ բոցակեզ Սրտին.

«Արա՛ գսիրտ մեր ըստ սրտին քում», Լիթանիա Սուրբ Սրտին Յիսուսի:

Տ. Հովսեփ Քհն. Գալստյան
08 հունիսի, 2020

Սիրտ Յիսուսի՝ «աղբիւր կենաց եւ սրբութեան... ի խոր խոցեալ տիգաւ»



«Ո՛վ Յիսուս, Աղբիւր ջրոյ կենդանոյ, առ Քեզ ծարաւիմ, Քեզ փափագիմ, Քեզ տուփամ, տու՛ր իմ ծարաւեալ ոգևոյս զՔեզ զովացումն: Ծարաւիմ ըմպել ի կրկին վտակաց կողիդ, որով եւ արբեալ սիրով գմայլիմ», Սբ. Ներսէս Լամբրոնացի

Տիրոջ Սուրբ Սիրտը «կենաց աղբյուր» է, ըստ Լիթանիայի բառերի, հավերժահոս աղբյուր, որտեղից բխող ջուրը աստվածային սիրո եւ ողորմութեան հեղումն է՝ աշխարհի վրա: Հովհաննէսի ավետարանի 7-րդ գլխում կարդում ենք, որ Տաղավարահարաց տոնի վերջին օրը Հիսուս կանգնած էր եւ աղաղակում էր. «Եթե մեկը ծարաւ է, թող ինձ մոտ գա եւ խմի», (Հվհ. 7, 37): Սամարացի կնոջ հետ զրուցելիս՝ ջրհորի մոտ, Հիսուս եւս խոսում է այն ջրի մասին, որ ինքն է տալիս.

«...ով խմի այն ջրից, որ ես եմ տալու նրան, հավիտյան չպիտի ծարաւի: Իսկ այն ջուրը, որ ես նրան տալու եմ, նրա մեջ կդառնա բխող ջրի աղբյուր՝ հավիտենական կյանքի համար» (Հվհ. 4, 13-14): Հիսուս այս ասում էր այն տոնի ժամանակ, երբ հրեաները հիշում էին Եգիպտոսի գերութեանից հետո իրենց անապատային տարիները: Եվ այդ տարիներին էր, որ Մովսէսն աղոթեց Տիրոջը, ձեռքի գավազանով հարվածեց ժայռին, եւ ջուր բխեց (Թվ. 20, 7-13): Հիսուս՝ խոսելով իր մասին՝ որպէս ջրի աղբյուրի, ինքն իրեն բացահայտում է որպէս ճշմարիտ ժայռ, որից բխում է դեպի հավիտենական կյանք տանող ջուրը: Եվ այդ ջուրը Տիրոջ Սուրբ Սրտից հեղվում է յուրաքանչյուրիս սրտի մեջ, ով նրան մոտենում է՝ դարձի եկած այն սամարացի կնոջ խոսքերը սրտում պահած եւ որպէս աղոթք՝ իր շուրթերի վրա. «Տե՛ր, տու՛ր ինձ այդ ջուրը, որպէսզի չծարաւեմ» (Հվհ. 4, 15): Հիսուս իր Սրտում կատարում է մարգարեութունները. «Դուք ուրախութեամբ ջուր կվերցնէք Փրկչի աղբյուրից», Ես. 12, 3, «եւ Գառը ... կհոսի նրանց ու կառաջնորդի նրանց դեպի կյանքի աղբյուրը», Հյտն. 7, 17, «Հրեշտակն ինձ ցույց տվեց նաեւ բյուրեղի պէս մաքուր կենդանի ջրի մի գետ, որ բխում էր Աստծո եւ Գառան գահից, այն հոսում էր քաղաքի հրապարակների միջով...», Հյտն. 22, 1:

Տիրոջ Սուրբ Սրտից բխող կենդանի ջրի ամենակատարյալ պատկերն ավետարանում, թերեւս, Հովհաննէսի մոտ նկարագրվող խաչելութեան դրվագն է, երբ գինվորը տեգով խոցեց խաչյալ Հիսուսի կողը, եւ «խսկույն արյուն եւ ջուր ելավ» (Հվհ. 19, 34): Եկեղեցու հայրերի համար Հիսուսի տեգով ծակված կողից հոսող ջուրը եւ արյունը Նրա Սուրբ Սրտից առատորեն հոսող սիրո բխումն է, որից սկիզբ է առնում եւ սնվում, լիառատ ողողվում Տիրոջ Սուրբ Եկեղեցին՝ Քրիստոսի խորհրդավոր Մարմինը: Հիսուսը խաչվեց, որից հետո՝ միայն իր Սիրտը առատորեն

բացեց՝ որպէս կենդանի եւ անսպառ ջրի աղբյուր՝ ամբողջ աշխարհի համար, ըստ ավետարանչի խոսքերի. «Ով ինձ հավատում է, նրա ներսից կենդանի ջրերի գետեր պիտի բխեն»: Նա այս խոսքերն ասում էր Հոգու մասին, որն ընդունելու էին իրեն հավատացողները, քանի որ Հոգին դեռեւս չունէին, որովհետեւ Հիսուսը դեռ փառավորված չէր» (Հվհ. 7, 38-39): Հիսուսի փառավորումը եղավ իր խաչելութեան ժամը, որի լրումն էր, կարծես, գինվորի տեգով կողի խոցվելը, որտեղից իր Հոգին՝ ջրի եւ արյան տեսքով, հոսեց ու ողողեց իր առաքյալներին եւ բոլոր իրեն հավատացողներին: Այս պատկերը նաեւ եղավ բացատրութունը Կանայի հարսանիքի հրաշքի, երբ Հիսուս տաշտակների ջուրը գինի դարձրեց՝ ի կանխանշումն իր կողից հեղվելիք ջրի եւ արյան, Սուրբ Հոգու հեղման, որ լիուլի լցնում է բոլոր հավատացյալների հոգիներն ու սրտերը, ինչպէս ընտիր գինին արբեցրեց Կանայի հարսանքավորներին: Ուրեմն, Տիրոջ տիգախոց Սիրտը դարձավ ակունքը՝ Սուրբ Հոգու հեղման, որ Ամենասուրբ Երրորդութեան մեջ հավիտենապէս գոյութուն ունեցող Սերն է, ըստ առաքյալի խոսքի. «Աստված սեր է» (Ա Հվհ. 4, 16), որը լցվում է մեր մեջ. «Աստծո սերը լցվում է մեր սրտերում՝ Սուրբ Հոգու միջոցով, որ արվեց մեզ» (Հռմ. 5, 5):

Սուրբ Երրորդութեան հավիտենական սիրով, որ բխում է Հիսուսի Սուրբ Սրտից եւ Հոգով լցվում մեր մեջ, մենք կայանում ենք որպէս Տիրոջ մեկ ընտանիք, մեր խորհրդավոր Մարմին, որտեղ կոչված ենք արտացոլելու Սուրբ Երրորդութունը՝ որպէս սիրո ամենակատարյալ համայնք: Սա՛ է տանում դեպի սրբութիւն՝ Աստծո սերը, սա՛ է մեր սրտերը ձգում դեպի աստվածային Սուրբ Սիրտը, ըստ իր խոսքի՝ «երբ բարձրանամ երկրից, բոլորին կձգեմ դեպի ինձ»: Հիսուս իր Խաչի վրայից մեզ ձգում է դեպի իր տիգախոց Սիրտը եւ տալիս է ու սովորեցնում ի սպառ սեր, որ սրբացնում է մարդուն, ինչպէս Հիսուս ինքն իրեն սրբացրեց մեզ համար.

«Եվ ես ինձ սրբացնում եմ նրանց համար, որպեսզի նրանք էլ սրբացվեն ճշմարտութեամբ», Հվհ. 17, 19: Հիսուս Հոր աջ կողմում է եւ մեզ բոլորիս ձգում է դեպի Երկինք՝ ճշմարտութեան Հոգով, որ առաջնորդում է մեզ դեպի սրբութուն:

Տ. Հովսեփ Քհն. Գալստյան
16 հունիսի, 2020



ԵՐԻՏԱՍԱՐԴՆԵՐՆ՝ Ի ԳՈՐԾ

Սիգավետի երիտասարդների մեջ կա մի կորիզ, որ ունի ջերմեռանդ հավատքի ապրում, մշտապես ներկա է Սուրբ Պատարագին եւ մյուս միասնական աղոթքներին, քայլեր է կատարում՝ հոգեւոր-հասարակական ծրագրեր իրականացնելու ուղղութեամբ: Երիտասարդներին կարելի է միասին տեսնել հատկապես եկեղեցական տոների օրերին, միասին աղոթելիս, բեմադրութուններ անելիս, հատկապես, Սուրբ Սարգսի ժամանակ, երբ միասին տոնում ենք սրբի հիշատակը, խնդրում նրա բարեխոսութունը, ապա հավաքվում են, գրուցում, արտասանում բանաստեղծութուններ, խոսում ապագա անելիքների եւ գյուղի երիտասարդական կյանքն աշխուժացնելու մասին: Նրանցից մի քանիսը նաեւ ամեն տարի կամավոր սկզբունքով աշխատում են «Աղաջանյան ամառային ճամբարում»՝ որպես ջոկատավարներ: Որպես լավ ջոկատավարներ՝ 2019-ին նրանցից երեքը մեկնեցցին նաեւ Լիբանան եւ մասնակցեցին Մյուռուտուրհանքի արարողութեանը: Ամենակտիվները ամեն 3 տարին մեկ նաեւ մասնակցում են Համաշխարհային երիտասարդական օրերին՝ աշխարհի տարբեր երկրներում: Մեզ դեռեւս չի հաջողվել ձեւավորել կանոնավոր օրակարգով երիտասարդական միութիւն, բայց գտնվում ենք այդ ճանապարհին՝ սպասելով նախաձեռնող երիտասարդների, ովքեր կկարողանան ժամանակ տրամադրել գյուղում կանոնավոր աշխատանքների իրականացմանը:

«Հույսի եւ փոփոխություն առաջամարտիկները». Սիգավետի երիտասարդները մասնակցում են համայնքային զարգացման սեմինարների



Եւ հավատքով:

2020թ. հունվարի 27-ին Գյումրիի Լոֆթ մշակութային-ժամանցային կենտրոնում կազմակերպեցինք 2-րդ զարգացողական սեմինարը՝ Աշոցքի հայ կաթողիկէ չորս համայնքների՝ Մեծ Սեպասարի, Բավրայի, Ղազանչիի եւ Սիգավետի 35 պատանիների եւ երիտասարդների համար: Որպես սեմինարի խորագիր ընտրեցինք «Երիտասարդները՝ փոփոխութիւնների առաջամարտիկներ», որը տրամաբանական շարունակութիւնն է նախորդ սեմինարի, որ կոչվում էր «Երիտասարդները՝ հույսի առաջամարտիկներ»: Սեմինարի կազմակերպման նպատակը երիտասարդներին օգնելն է՝ լինելու իրենց համայնքներում դրական փոփոխութիւնների նախաձեռնողներ, գաղափարներ գեներացնողներ, խնդիրների լուծումների նոր ճանապարհների որոնողներ, նոր զարգացողական ծրագրեր մշակողներ եւ իրականացնողներ՝ ամենատարբեր ոլորտներում՝ առաջնորդելով Ավետարանի սկզբունքներով



Սեմինարը վարելու համար հրավիրել էինք նաեւ Քրիստինե Մխիթարյանին, որ երիտասարդների հետ աշխատանքի մեծ փորձ ունի եւ Հայկական Կարիտասի «Ծխական հասարակական խորհուրդներ», «Շահերի պաշտպանութիւն» ծրագրերի ղեկավարն է:

Նախ այս սեմինարների կազմակերպման իմ տեսլականի եւ հետագա անելիքների մասին խոսեցի հետեւյալը. «Միրելինե՛ր, այս երկրորդ սեմինարը շարունակում է նախորդի թեման: Տրամաբանութիւնն հետեւյալն է. դուք կոչված եք լինելու եւ արդեն իսկ հանդիսանում եք Եկեղեցու եւ ձեր համայնքի հույսը, եւ որպէս այդպիսին, կոչված եք լինելու եւ արդեն իսկ սկսել եք լինել Եկեղեցում եւ համայնքում դրական փոփոխութիւնների կրողները կամ առաջամարտիկները: Նախ ի՞նչ է նշանակում այս բառը՝ «առաջամարտիկներ»: առաջամարտիկներն այն զինվորներն են, ովքեր մարտի դաշտում գնում են գործի առջեւից եւ, ըստ հույսի, առաջնորդում են բանակը: Դուք պետք է լինեք այդպիսի զինվորների նման՝ որպէս կենդանի հույս Եկեղեցու համար եւ համայնքի համար, ինչպէս որ ձեր ընտանիքների հույսն էք:

Նախորդ սեմինարի ժամանակ խոսեցինք ձեր մեջ թաքնված եւ արդեն իսկ դրսևորվող հսկայական ներուժի, հավատքի, լավատեսութեան, ապագայի հանդեպ վստահութեան մասին: Այդ վստահութիւնը բխում է ձեր հավատքից, որ ապրում եք միասին Տեր Հիսուս Քրիստոսի հետ միութեան մեջ, գործադրում եք մեր երիտասարդական միութեան տարատեսակ ձեռնարկներում:

Հավատքի կենդանի ապրումը, զարգացումը հնարավոր է՝ մշտապես պահելով երիտասարդական ավյունը, խանդավառութիւնը, նոր բարձունքներ նվաճելու կամքը, փափագը, ապագայի վառ երազանքները, գաղափարներ, որոնք թվում են շատ դժվար իրագործելու համար, բայց շարունակ ոգեշնչում եւ կանչում են դեպի նոր նվաճումներ, զարգացում, կատարելագործում: Այս ամենը կախված է ձեզանից եւ ձեր առջեւում է, սպասում է ձեզ, թե երբ եք սկսելու ձեր պայքարը, թե երբ եք վճռականորեն մարտի բռնելու ձեր իսկ թուլութիւնների դեմ, ձեր հուսահատութիւնների դեմ, ձեր եւ ձեր ծնողների, ընկերների անհույս վատատեսութեան դեմ, երբեմն նույնիսկ ոչինչ չանելու եւ ինքնահոսի մատնվելու վիճակի դեմ, որ համակում է շատ երիտասարդների եւ մեծահասակների: Դուք պետք է մարդկանց հու՛յս ներշնչեք ձեր եռանդով եւ ձեր կոնկրետ գործերով, ծրագրերով, համայնքի կյանքում բերելով դրական փոփոխութիւններ, որոնք բոլորի համար անվիճելի են եւ հուսադրող, որոնք կարող են փաստել բոլորին, որ ամենամանկույցս պայմաններում նույնիսկ հնարավոր է եւ պե՛տք է աշխատել՝ ելքեր գտնելու համար, եղածը ավելի լավը դարձնելու, կատարելագործելու համար, Աստծո առաջ ամեն ժամ ավելին լինելու համար, ավելի հոգեւոր, ավելի սուրբ, ավելի արդար լինելու համար, ավելի կիրթ եւ բարձրաճաշակ լինելու համար, ավելի բարեկեցիկ ապրելու համար:

Ուրեմն, փոփոխութիւնների սկիզբը ձեր մեջ եղած հույսն է, որ հիմնված է ձեր հավատքի եւ Աստծո հանդեպ ձեր սիրո վրա: Պետրոս առաքյալն իր նամակում ասում է հետեւյալը.

«Մշտապես պատրաստ եղեք պատասխան տալու ամեն մարդու, որ կհարցնի ձեր մեջ եղած հույսի մասին», Ա Պտ. 3, 15:

Հույսի մասին պատասխան տալ պետք է մեր հավատքի եւ սիրո վկայութեամբ, որ պետք է արտահայտվի մեր գործերով: Այդ գործերը պարտադիր չէ, որ լինեն մեծ ծրագրեր, այլ պետք է սկսվեն փոքրիկ քայլերից, որոնք սակայն, արվում են մեծ սիրով, ինչպէս ասում է Սբ. Մայր Թերեզան: Միայն մեկ կարեւոր բան կա. այդ փոքրիկ քայլերը պետք է լինեն անընդհատ եւ միշտ առավել շատ, որակապես առավել բարձր:

Եթե հիշում եք, այս տարեսգբի հանդիպման ժամանակ ես ասացի, որ այս տարի ավելի շատ բան ենք անելու, քան՝ նախորդ տարի եւ մեր միութեան թերթը առավել շատ բան պետք է պատմի համայնքին ձեր մասին: Այդ քայլերը պետք է անենք միասին, եւ հարկ է, որ ձեզանից յուրաքանչյուրը հանդես գա նոր գաղափարներով, որոնք կարող են վերաբերել եւ՛ եղած քայլերը ավելի լավը դարձնելուն եւ՛ նոր քայլեր անելուն, ծրագրեր կազմելուն եւ իրականացնելուն, անկախ նրանից՝ այդ ծրագրերն իրականացնելու հնարավորութիւններն այս պահին կան, թե ոչ:

Պետք է յուրաքանչյուրը ինքներդ ձեզ պատկերացնեք որպէս անընդհատ ստեղծագործող եւ երբեք կանգ չառնող ստեղծարարներ, գյուտարարներ, արվեստագետներ, ճարտարապետներ՝ բայց ոչ նեղ մասնագիտական իմաստով:





Յուրաքանչյուրդ պետք է լինեք գաղափարներ ծնող եւ զարգացնող պարարտ հող, որոնց մեջ կա կյանք եւ այն միշտ խոստանում է անել, զարգանալ՝ ճիշտ Երկնքի Արքայութեան սերմի նման, որն ինչպես Հիսուս ասում է, սկզբում մանանեխի հատիկի չափ է, բայց երբ անում է, դառնում է մի մեծ ծառ, որի ճյուղերին հանգստանում են թռչունները: Այսպիսին պետք է լինի ձեր յուրաքանչյուր գաղափարը եւ ծրագիրը: Նախ՝ փոքր կամ դեռեւս անորոշ, սաղմնային վիճակում, բայց երբ մտածեք յուրաքանչյուր քայլը, աշխատեք, փորձ ձեռք բերեք եւ, որ շատ կարեւոր է, աղոթեք այդ գաղափարների համար, դրանք կաճեն կդառնան իսկական ծառեր եւ շատերի համար կլինեն գարգացման, բարեկեցութեան, հոգեւոր մխիթարութեան հնարավորութիւններ:

Ես աղոթում եմ, որ դուք լինեք առավել ջերմեռանդ հավատքի մեջ եւ առավել ջանասեր ինքնուրույն նախաձեռնութիւններով հանդես գալու եւ դրանք իրագործելու միջոցները գտնելու մեջ: Այսպիսի հանդիպումները ձեզ կօգնեն լինել ավելի նախաձեռնող եւ գտնել հնարավորութիւններ:

Դավիթ թագաւորը, որ նաեւ սաղմոսներ էր գրում, մի շատ ոգեւորիչ աղոթք ունի.
«Տե՛ր, Քեզնո՛վ միայն զինված պիտի վագեմ եւ իմ Աստծու շնորհիւ պիտի անցնեմ պարսպի վրայով», Բ Թգ., 22:30:

Քրիստինե Մխիթարյանն իր կարեւոր նյութը երիտասարդներին ներկայացրեց հետաքրքիր բացատրութիւններով եւ քննարկումների միջոցով, լսելով երիտասարդների կարծիքները, նրանց առիթ տալով խորհրդածել սեփական կարողութիւնների, տաղանդների մասին, թե ինչպես կարող են դրանք դրսեւորել եւ ինչպես կարող են գաղափարներ հղանալ ու զարգացնել իրենց համայնքներում: Նա շեշտեց, որ յուրաքանչյուր անձ կարող է փոփոխութիւններ բերել իր իրականութեան մեջ՝ ջանալով ոչ թե նախ փոխել իրականութեան պայմանները, այլ՝ նախ սեփական անձը, հաղթահարել վախերը, թերահավատութիւնը, սահմանել նպատակներ, երազանքներ, ոգեշնչվել ու ջանք թափել դրանք իրականութիւն դարձնելու համար՝ չվախենալով միջոցների սահմանափակ լինելուց: Նա առաջարկեց երիտասարդներին մտածել «աշխարհը փոխելու 6 քայլերի մասին», դրանք են՝

- 1. ոգեշնչվել, 2. լինել տեղեկացված, 3. բացահայտել սեփական տաղանդները, ուժեղ կողմերը, 4. լինել խիզախ եւ գործել՝ մանրամասն ծրագրելով ամեն մի քայլ, 5. թույլ կողմերը լրացնել ուրիշների օգնութեամբ, թիմային աշխատանքով, գտնել ճիշտ մարդկային ռեսուրսներ, 6. տոնել յուրաքանչյուր փոքր հաղթանակ՝ վստահ լինելով, որ կարողացար դրական փոփոխութիւն բերել:

Քրիստինեից հետո Բավրայի Երիտասարդական միութեան անդամ Անդրանիկ Մարգարյանը, որ այս տարվա հունվարի 12-21-ը Հայկական Կարիտասի կողմից հրավիրվել էլ Ֆրանսիայում մասնակցելու համայնքներում սոցիալական ծրագրերի փորձի փոխանակման մի ծրագրի, պատմեց Ֆրանսիայում Կարիտասի ծրագրերի եւ գաղափարների մասին, որոնք կարող են երիտասարդներին օգնել զարգացնել իրենց գաղափարները տեղի համայնքներում:

Հանդիպումն ավարտվեց միասնական աղոթքով եւ թեման հետագա սեմինարներում զարգացնելու մասին քննարկումներով, գաղափարային նոր առաջարկներով:

Տ. Հովսեփ Գալստյան

«Ժամանակը հնարավորություն է». առցանց երկու սեմինար



Յովալի է, որ այս չարիք համաճարակի օրերին անհնար է դարձել կազմակերպել միասնական հանդիպումներ երիտասարդների եւ պատանիների հետ, բայց ջանում ենք գտնել ուղիներ՝ պահելու մշտական կապը, հաղորդակցութիւնը միմյանց միջեւ, այլապես մեզ սպառնում է իրական սոցիալական հեռացումը: Մենք, որպես Տիրոջ ընտանիք, որ կապված ենք միմյանց հետ որպես Տեր Հիսուս Քրիստոսի Խորհրդավոր Մարմնի անդամներ՝ միմյանց շողկապված Տիրոջ Սուրբ Հաղորդութեամբ, պարտավոր ենք ամեն ժամ առավել զարգացնել եւ ջերմ պահել հոգեւոր եւ սոցիալական մտերմութիւնը միմյանց միջեւ՝ անկախ այն բանից, թե համաճարակը դեռ քանի օր

մեզ կստիպի ֆիզիկապես հեռու գտնվել միմյանցից եւ Սուրբ Հաղորդութիւնը իրապես ճաշակելուց: Այս մտայնութեամբ որոշեցինք երիտասարդական հանդիպումները, սեմինարները շարունակել՝ օգտագործելով համացանցային սոցիալական ցանցերի հնարավորութիւնները, ինչը լավագույն արդույնք չի խոստանում, բայց, վստահաբար, միշտ արդյունավետ հոգեւոր շարժման մեջ է պահում բոլորիս, եւ հիշում ենք, որ միասին ենք,



որ ունենք միասնական առաքելութուն՝ զարգանալ որպէս Տիրոջ Եկեղեցի, որպէս համակողմանիորեն զարգացած, հասարակական բարիք ստեղծող, նախաձեռնող անհատներ. «Հոգով եռացե՛ք», Հռմ. 12, 11:

Առցանց հանդիպումների համար որպէս առաջին թեմա ընտրեցինք «Ժամանակի կառավարումը», որի շուրջ խոսեցինք երկու հանդիպումների ընթացքում: Մասնակցեցին քսան երիտասարդներ ու պատանիներ՝ Բավրայից, Մեծ Սեպասարից, Ղազանչիից եւ Սիգավետից: Առցանց սեմինարը վարեցին Հայկական Կարիտասի Շահերի պաշտպան Քրիստինե Մխիթարյանը, Բավրայի երիտասարդական միութեան համակարգող Անդրանիկ Մարգարյանը եւ ես:

Առաջին հանդիպման (27 ապրիլի, 2020) ընթացքում, որպէս նախաբան, նախ խոսեցի առցանց սեմինարներ կազմակերպելու այս նախաձեռնութեան նպատակի մասին եւ քաջալերեցի երիտասարդներին ակտիվորեն մասնակցել, որովհետեւ թանկ է յուրաքանչյուրի՝ կարծիքը եւ նախաձեռնութիւնը: Շեշտեցի, որ ժամանակը Աստծո պարգեւն է մեզ եւ, ըստ էութեան, մեր կյանքն է, որ ապրում ենք այս աշխարհում: Մենք պարտավոր ենք այդ մեծ պարգեւն օգտագործել պատասխանատուութեամբ՝ գնահատելով յուրաքանչյուր վայրկյանը եւ այն դարձնել հնարավորութիւն՝ զարգանալու համակողմանիորեն որպէս մարդ, որ կրում է Աստծո պատկերը եւ նմանութիւնը, ոչ կոչված է իր աստվածատուր տաղանդներն օգտագործել ոչ միայն իր կատարելագործման, այլեւ համընդհանուր բարիք ստեղծելու համար՝ եղբայրասիրութեան ավետարանական եւ համամարդկային սկզբունքներով:

Քրիստինե Մխիթարյանը ներկայացրեց ժամանակը ճիշտ կառավարելու մի քանի հմտութիւններ, սկզբունքներ, օրինակ՝ ինչպէս կազմակերպել օրվա զբաղվածութեան ժամանակացույցը, որ հնարավոր լինի առավելագույնս արդյունավետ օգտագործել օրը եւ ժամանակ խնայել: Անդրանիկ Մարգարյանը կազմակերպեց խաղ-վարժանք՝ սովորելու համար, թե ինչպէս կարելի է գործողութիւնները կատարել ավելի քիչ ժամանակ ծախսելով:

Երկրորդ հանդիպումը (3 մայիսի, 2020) շարունակեց առաջինի թեման՝ այլ շեշտադրութեամբ՝ «Ժամանակը հնարավորութիւն է»: Աստված մեզ պարգեւել է մեր կյանքի ժամանակը, բայց ինչի՞ համար. սա էր գլխավոր հարցադրումս երիտասարդներին: Հրավիրեցի մտածել հետեւյալ հարցերի շուրջ.

- ինչպէ՞ս օգտագործել ժամանակը՝ մեր նպատակներին եւ երազանքներին առավելագույնս ծառայեցնելու համար,
- ինչպէ՞ս տարբերել առաջնայինը երկրորդականից, ի՞նչ սկզբունքներով առաջնորդվել՝ զբաղվածութեան արժեքը գնահատելիս,

-ինչպէ՞ս անցկացնել ժամանցը եւ հանգիստը, որ չստացվի ժամանակի վատնում:

Քրիստինե Մխիթարյանը ներկայացրեց նպատակներ սահմանելու եւ առաջնայինը երկրորդայինից զանազանելու սկզբունքներ եւ բացատրեց, թե ինչպէս կարելի է դրանք կիրառել: Նյութը շատ հարուստ էր եւ հետաքրքիր, ինդրեցի, որ այդ հարցերի շուրջ առավել երկար ու հանդարտ մտածեն մեր երիտասարդները:

Անդրանիկը ներկայացրեց համակարգչային ծրագրեր՝ նպատակները դասակարգելու, ժամանակը ճիշտ կառավարելու համար:

Երիտասարդներն արտահայտեցին իրենց կարծիքները, սեփական պատմութիւնները՝ նպատակները սահմանալու եւ իրենց առաքելութիւնը հասկանալու մասին, որոնք շատ հետաքրքիր էր լսել: Ես էլ կիսվեցի իմ փորձառութեամբ, որ, հուսով եմ, օգտակար եղավ:

Ժամանակը ճիշտ բովանդակութեամբ ապրելը, թերեւս, ամենաառանցքային խնդիրներից մեկն է այսօր՝ երիտասարդի համար, որ ապրում է իր կյանքի ամենակարեւոր որոշումները կայացնելու վճռական տարիները: Որպեսզի հետո չզղջանք սխալ որոշումներ կայացելու եւ մեր հնարավորութիւնները բաց թողնելու համար, հարկ է այսօր, հենց հիմա՛, ժամանակ չկորցնել եւ ինքներս մեզ համար հստակեցնել, թե որն է մեր երազանքը, որոնք են մեր նպատակները, դեպի ուր ենք գնում, ինչի համար ենք սովորում կամ աշխատում: Այս բարդ եւ պատասխանատու ճանապարհը մենք պարտավոր ենք անցնել Տեր Հիսուս Քրիստոսի՝ մեր միակ անդավաճան ընկերոջ եւ Խորհրդատուի հետ միասին, աղոթքով եւ Նրա Սուրբ Անձի հետ մտերմութեամբ, որպեսզի իր օգնութեամբ կարողանանք գնահատել մեր յուրաքանչյուր վայրկյանը եւ ճիշտ օգտագործենք՝ ինքներս մեզ եւ հասարակութեանը առավելագույն բարիք անելու համար՝ ի փառս Աստծո:

Տ. Հովսեփ Գալստյան



Հայ երիտասարդները եւս գործուն կերպով միացան Պապի Laudato Si նամակի հորեյանական շարաթվան

2020թ. մայիսի 16-24-ը Սուրբ Աթոռի Մարդկային Համապարփակ զարգացման վարչութիւնի նախաձեռնութեամբ հայտարարուեց Ն.Ս. Ֆրանցիսկոս Քահանայապետի 2015թ. հրապարակած «Գովեմ գՔեզ»՝ Laudato Si, շրջաբերականին նվիրված շաբաթ: Նպատակն էր՝ հինգ տարի անց ողջ Ընդհանրական եկեղեցու ուշադրութեամբ դարձյալ հրավիրել այդ հուշի կարեւոր եւ միշտ արդիական սոցիալ-բնապահպանական բովանդակութեան փաստաթղթի վրա եւ առիթ տալ վերստին մտածելու նամակի տեսլականի եւ առաջ քաշած մարտահրավերների շուրջ:



Սուրբ Աթոռի վարչութիւնի հրավերին ընդառաջեցին աշխարհի շատ կաթողիկէ համայնքներ եւ բարեսիրական կազմակերպութիւններ: Մենք եւս ջանացինք կիսել այդ համընդհանուր համերաշխութեամբ եւ փաստաթղթի արժեքները: Հայաստանի հյուսիսային չորս կաթողիկէ համայնքների՝ Մեծ Սեպասարի, Ղազանչիի, Բավրայի եւ Սիգավետի երիտասարդների հետ միասին նախաձեռնեցինք միջոցառումների շարք, որոնք կոչված են իրենց հերթին լինելու մեկնարկ՝ ամբողջ տարվա համար նախատեսվող միջոցառումների: Այս նախաձեռնութեանն իր աջակցութեամբ հայտնեց նաեւ Հայկական Կարիտաս բարեսիրական կազմակերպութիւնը, որի՝ համայնքներում իրականացրած ծրագրերում, որպէս կամավորականներ, ընդգրկված են նաեւ այդ համայնքների երիտասարդները:

Մայիսի 16-ին եւ 17-ին չորս համայնքների եկեղեցիների եւ երիտասարդական կենտրոնների տարածքներում կատարեցինք մաքրման աշխատանքներ: Մայիսի 17-ին եւ 24-ին չորս համայնքների 20-ից ավելի երիտասարդների հետ կազմակերպեցինք երկօրյա առցանց երկու սեմինար, որոնց ընթացքում երիտասարդներին ներկայացրեցի «Գովեմ գՔեզ» փաստաթղթի բովանդակութեան հիմնական էությունը, քննարկեցինք առանձին գաղափարներ, սոցիալ-բնապահպանական խնդիրները, դրանց լուծման երիտասարդական պատկերացումները, իրենց պատրաստած հետաքրքիր նյութերը ներկայացրեցին նաեւ երիտասարդները (Կատյա Մարգարյան, Անդրանիկ Վարդանյան): Այսպիսով, հարթակ ստեղծվեց նաեւ երիտասարդների ինքնարտահայտման համար՝ անկախ մասնագիտական պատրաստվածութիւնից: Որոշեցինք առաջիկա օրերին միասին իրականացնել բնապահպանական փոքրիկ ծրագրեր՝ ծառատունկ, տարածքները, դաշտերը, լճերի տարածքները աղբից մաքրելու, մարդկանց իրազեկման գործողութիւններ, առցանց եւ կենդանի միջոցառումներ:

Ծառատունկը իրականացրեցինք Հայկական Կարիտասի օգնութեամբ: Տիրոջ Համբարձման տոնին Բավրա, Սիգավետ եւ Ղազանչի համայնքներում տեղի կամավորական երիտասարդների հետ միասին տնկեցինք հինգ տեսակի (բարդի, հացենի, լորենի, թխկենի, կաշտան) դեկորատիվ 120 ծառ՝ եկեղեցիների եւ Ղազանչիի երիտասարդական համալիր կենտրոնի բակերում: Երիտասարդները ստանձնել են պատասխանատվութիւն՝ մշտապէս պահպանելու նորատունկ ծառերը, որովհետեւ դրանք երաշխիք են իրենց համայնքների կանաչ եւ մաքուր ապագայի, ինչպէս նաեւ Աստծո արարչագործութեան հանդէպ իրենց սիրո մի գեղեցիկ արտահայտութիւն են:





**Մելիք Միքայելյանի
բանաստեղծություններից**

ՓՈՇՈՏ ԿԱՐՈՏ

*Փոշոտ կարոտը ուսերիդ առած՝
Քայլում ես նեղ-նեղ արահետներով,
Ու քո անցյալը հետեւում թողած,
Գալիս ես ինձ մոտ պարզկա գիշերով:*

*Տաքուկ գրկում ես մարմինս հոգնած
Ու երգում սիրո մարող մեղեդին,
Քայլում ես ինձ հետ՝ վշտերով լցված,
Որ ընկեր դառնանք կարոտի ցավին:*

*Մեմ-մեկ լռում ես աչքերդ օտար,
Երբ որ փնտրում եմ կյանքի բանալին,
Քայլում եմ ահա դեպի հորիզոն,
Գուցե հանդիպեմ բացվող դռներին:*

16.05.2018թ.

ՄԵՂՔԵՐՍ ՆԵՐԻՐ

*Աստված խնդրում եմ մեղքերս ներիւ
Տիրուլթյան ժամին եղել եմ սխալ,
Խավարը քողը գցել է վրաս
Հոգիս ուզում է քեզանով ցնծալ:*

Խռովքի մեջ տանջվել եմ ահագին

*Կորցնելով քո պատկերը լուսավոր,
ԵՎ ուզում եմ սիրտս ապրի քո կողքին
Որ ինձ չզգամ վշտահար ու մենավոր:*

*Կապուտակ է հոգուս երկինքը այսօր,
Ես գտել եմ ճանապարհը քո լույսի,
ԵՎ ապրում եմ քո սրտի մեջ գորավոր
Որ իմ սիրտը հավերժ քեզնով բաբախի:*

21.07.2019թ.

ԻՄ ԾՆՆԴԱՎԱՅՐԸ

*Իմ ծննդավայր, դու փոքրիկ մի գյուղ ու շատ հարագատ,
Դու փոքրիկ դրախտ, քո գրկում եմ ես ապրել միշտ ազատ,
Սիրո հանգրվան Սիզավե՛տ աշխարհ, դու իմ աննմա՛ն
Դաշտերդ կանաչ, դու գմրո՛ւխտ երկիր, փոքրի՛կ Հայաստան:*

Գովերգում եմ ես իմ գյուղը,ինձ հարազատ մի աշխարհ,
Իմ տողերը քեզ համար են,իմ աղոթքն է քեզ համար,
Քո դաշտերում միշտ կբուրեն ծաղիկները հոտավետ,
Ծննդավա՛յր իմ հարազատ,լուսե հեքիաթ Սիգավետ:

Դու երազանք ինձ համար եւ մի օջախ սրբազան,
Իմ հուշերի փոքրի՛կ գյուղ՝ երազներով մանկական,
Դու կմնաս միշտ կանգուն,կապրես դարեր անասան,
Ծննդավա՛յր իմ փոքրիկ, իմ Սիգավե՛տ աննման:

22.05.2016թ.

**Կենսագրական գծեր
Մելիք Վաչիկի Միքայելյան**



Ծնվել եմ 1995թ. հունիսի 8-ին Շիրակի մարզի Սիգավետ գյուղում: 2001-2012թթ. սովորել եւ ավարտել եմ Սիգավետի միջնակարգ դպրոցը: 2012թ. ընդունվել եմ Միքայել Նալբանդյանի անվան Գյումրու պետական մանկավարժական ինստիտուտի (այժմ Շիրակի Մ.Նալբանդյանի անվան պետական համալսարան) պատմաբանասիրական ֆակուլտետի իրավագիտություն բաժինը: 2013-2015թթ. ծառայել եմ ՀՀ Զինված Ուժերում: 2015թ.-ից ուսումնա շարունակել եւ 2019թ.-ին ավարտել եմ Շիրակի Մ. Նալբանդյանի անվան պետական համալսարանի սոցիալական գիտությունների եւ իրավունքի ֆակուլտետի իրավագիտություն բաժնում: Այժմ սովորում եմ նույն համալսարանի իրավագիտություն բաժնի մագիստրատուրայում:

Ստեղծագործել սկսել եմ տասը տարեկանից: Բանաստեղծություններն առաջին ժողովածուն տպագրվել է 2017թ-ին՝ «Արծաթ հայելի» խորագրով: Մասնակցել եմ Արարատ Մկրտումյանի անվան ամենամյա մրցանակաբաշխությանը եւ տպագրվել «Կրակե ձայների խեցի» գրական օնթոլոգիայում: Այժմ էլ շարունակում եմ ստեղծագործել, հետաքրքրված եմ նաեւ երգարվեստով, ունեմ ձայնագրված ոչ հեղինակային մեկ երգ:

**Տե՛ր, Քեզ եմ վստահում իմ կյանքը
Հեղ.՝ Արգիսե Պողոսյան**



Աստված ամենակարեւորն է յուրաքանչյուրիս կյանքում, ամեն ինչ իմաստալից է Աստծո միջոցով: Ինչպես Սուրբ կույս Մարիամը Գաբրիել հրեշտակի ավետման լուրին պատասխանեց. «Ահավասի՛կ ես մնում եմ Տիրոջ աղախինը, թող քո խօսքի համաձայն լինի ինձ», մենք եւս պիտի մտածենք եւ ասենք, որ թող Աստծո կամքը լինի հիմա, միշտ եւ հավիտյան: Ամեն քրիստոնյա մեծ հավատ պիտի ունենա առ Աստված, իսկ եթե մեկը մի փոքրիկ մանանելի հատիկի չափ հավատք ունենա, կարծում եմ, նա կարող է ունենալ երկնային արքայություն հասնելու հույս: Իսկ հավատք եւ Աստծուն նվիրվածություն ունեցող ամեն մարդ կժառանգի Աստծո երկնային արքությունը, որն ամենաբազմալի է ինձ համար: Առ Աստված սերը պետք է հասցնել գերագույն աստիճանի: Դրա համար մարդ պետք է լինի պայքարող, անհոգի չլինի, ունենա ես, որը օրինակելի է, քանի որ երկրի վրա մի բան հաստատ է. «Ինչ որ կցանես, այն էլ կհնձես»: Մարդ պիտի Աստծո ներկայությունը սրտում, աղոթքը շուրթերին, հոգին գուլալ ապրի, իր կյանքը առաքինի ու հիշի, որ կյանքը իր եւ Աստծո ձեռքերում է եւ Աստծո հովանու տակ: Պիտի Աստծուն դիմես, խնդրես սրտանց, չէ՞ որ Սուրբ գրքում գրված է՝ բախի՛ր եւ կբացվի քո առաջ:



Եթե խնդրենք Աստծուն ամենագոյատ արթնութեամբ, հոգեւորոգ զվարթութեամբ, ապա նա կհեռացնի մեզանից մառախուղը չարի, մթութեան մեջ եղած բոլոր ծուղակները, սուտն ու կեղծիքը: Սրբունհի Աստվածածնի եւ բոլոր Սրբերի բարեխոսութեամբ կունենանք հանգիստ մեր հոգիներում, խաղաղություն մեր սրտերում եւ ամենուր:

Անճառելի փառքերի ամենօրհնյալ Թագավոր, քեզ համար չկա անկարելի եւ անհնարին ոչինչ, Քո ողորմութեանն եմ խնդրում՝ ինձ, հայրենի երկրիս եւ հարազատ գյուղիս համար: Քոնն եմ ես եւ ուզում եմ մնա՛լ քոնը:

Սիգավետում քրիստոնեական ավանդույթները հիմնված են եղել դարեր ի վեր եւ դրանք շարունակական փոխանցվում են սերնդեսերունդ: Գյուղի տարեցները մեծ ակնածանքով եւ հավատարիմ քրիստոնյային հատուկ սիրով եւ հոգատարութեամբ փոխանցում են սերն ու հարգանքը Եկեղեցուն, գալիք սերունդներին: Դարեր շարունակ կատարած անտրտունջ եւ հավատարիմ աշխատանքի շնորհիվ է, որ այս ժամանակահատվածում Սիգավետ գյուղում կա Եկեղեցի եւ Սուրբ Պատարագ հաճախող, քրիստոնեավայել կենցաղ, բարք ու վարք ունեցող գյուղի երիտասարդ սերունդ: Նրանց կատարած աշխատանքի շնորհիվ է, որ երիտասարդ եւ ծաղկող սերունդը ոգեպես այնքան հարուստ է, կրթված եւ ամրակամ, որ շարունակում է իր նախնիների կատարած անգնահատելի գործը, գյուղում պահում է հավատքի ամրությունը արտաքին հարվածներից սեփական օրինակով եւ գործով: ԱՄԵՆ:



ՀԱՅՏԱՐԱՐՈՒԹՅՈՒՆ

Աղոթքները եւ Սուրբ Պատարագը՝ Սուրբ Ամենափրկիչ Եկեղեցում

Սիգավետի Սուրբ Ամենափրկիչ Եկեղեցում ամեն շաբաթ՝ ժամը 10:00-ին տեղի է ունենում Առավոտյան ժամերգություն, որից հետո՝ 11:00-ին, մատուցվում է Սուրբ Պատարագ:

Ըստ տոնական օրերի կամ աղոթական սովորությունների, տեղի են ունենում նաեւ այլ աղոթական եւ երիտասարդական ձեռնարկներ, որոնց մասին կարող եք իմանալ՝ ներկա լինելով Սուրբ Պատարագին, ինչպես նաեւ՝ ընթերցելով այս պարբերաթերթը:

Սպասում եմ բոլորիդ Վարդավառի կամ Պայծառակերպութեան տոնական Սուրբ Պատարագին՝ հուլիսի 18-ին՝ տոնի նախորդ օրը, շաբաթ, ժամը 11:00-ին, իսկ հուլիսի 20-ին՝ երկուշաբթի, ժամը 10:00-ին, օր մեռելոց Պատարագին, որ կմատուցվի ձեր ննջեցյալների համար:

Այս համաճարակի օրերին, խնդրում եմ, Եկեղեցի եկե՛ք՝ համապատասխան պաշտպանիչ միջոցներով:

Սպասում եմ բոլորիդ՝ միասնական աղոթքի:
Ձեզ հանձնում եմ Տիրամոր եւ Հիսուսի Սուրբ Սրտի բարեխոսութեանը:
Աստված օրհնի՛ բոլորիդ ընտանիքները եւ պահի իր հզոր աջի ներքո:

S. Հովսեփ



Թերթի հովանավորներ՝



Արհ. Տ. Ռաֆայել Արքեպս. Մինասյան՝ Առաջնորդ Կաթողիկէ Հայոց Հայաստանի, Վրաստանի, Ռուսաստանի, Ուկրաինայի եւ Արեւելյան Եվրոպայի



«Հայկական Կարիտաս» բարեսիրական հասարակական կազմակերպություն

**Թերթը կազմեց՝ Տ. Հովսեփ Քհն. Գալստյան՝
Հոգեւոր հովիվ՝ Մեծ Սեպասար, Ղազանչի, Բավրա եւ Սիգավեստ համայնքների
Հեռ.՝ 055698957**

Տպագրության քանակ՝ 70, տեսակը՝ սեւ ու սպիտակ, թուղթ՝ 80գր.

Գյուժրի, Հայ Կաթողիկէ Առաջնորդարան, 2020թ.